

Standardi Ndërkombëtar i Raportimit Financiar 4

Kontratat e Sigurimit

Objektivi

- 1 Objektivi i këtij SNRF është të specifikojë raportimin financiar për *kontratat e sigurimit* nga çdo njësi ekonomike që lëshon kontrata të tilla (përshtetur në këtë SNRF si një *sigurues*) derisa Bordi të plotësojë fazën e dytë të projektit të tij mbi kontratat e sigurimit. Veçanërisht ky SNRF kërkon:
- (a) përmirësime të kufizuara të kontabilitetit nga siguruesit për kontratat e sigurimit.
 - (b) dhënie informacionesh shpjeguese, të cilat identifikojnë dhe shpjegojnë shumat në pasqyrat financiare të siguruesit, të cilat rrjedhin nga kontratat e sigurimit dhe ndihmojnë përdoruesit e këtyre pasqyrave financiare të kuptojnë shumën, kohën dhe pasigurinë e flukseve të ardhshme të mjeteve monetare nga kontratat e sigurimit.

Objekti

- 2 Një njësi ekonomike duhet të zbatojë këtë SNRF për:
- (a) kontratat e sigurimit (përfshirë *kontratat e ri sigurimit*) që ajo lëshon dhe kontratat e ri sigurimit që ajo mban.
 - (b) instrumentet financiarë që ajo emeton me një *tipar pjesëmarrjeje të lirë* (shih paragrafin 35). SNRF 7 *Instrumentet financiarë: Dhënia e informacioneve shpjeguese* kërkon dhënien e informacioneve shpjeguese rreth instrumenteve financiarë, përfshirë instrumentet financiarë që përmbajnë tipare të tilla.
- 3 Ky SNRF nuk trajton aspekte të tjera të kontabilitetit nga siguruesit, të tilla si kontabiliteti për aktivet financiare të mbajtur nga siguruesit dhe detyrimet financiare të emetuara nga siguruesit (shih SNK 32 *Instrumentet financiarë: Paraqitja*, SNRF 7 dhe SNRF 9 *Instrumentet financiare*), me përjashtim të provizioneve kalimtare që jepen në paragrafin 45.
- (a) paragrafit 20A që lejon siguruesit që plotësojnë kriteret specifike për të zbatuar një përjashtim të përkohshëm nga SNRF 9;
 - (b) paragrafit 35B që lejon siguruesit të aplikojnë një metodë të veçantë për aktive financiare të përcaktuara; dhe
 - (c) paragrafit 45 lejon siguruesit të riklasifikojnë në rrethana të caktuara disa ose të gjitha aktivet e tyre financiare në mënyrë që aktivet të maten me vlerën e drejtë nëpërmjet fitimit ose humbjes.
- 4 Njësia ekonomike nuk do të zbatojë këtë SNRF për:
- (a) garancitë e produkteve të nxjerra direkt nga një prodhues, ndërmjetës ose shitës me pakicë (shih SNK 15 *Të Ardhurat* dhe SNK 37 *Provizionet, Detyrimet e Kushtëzuara dhe Aktivët e Kushtëzuara*).
 - (b) aktivet dhe detyrimet e punëdhënësit sipas skemave të përfitimeve të punonjësve (shih SNK 19 *Përfitimet e punonjësve* dhe SNRF 2 *Pagesat e bazuara në aksione*) dhe detyrimet e përfitimit të pensionit të raportuara nga skemat e përfitimit të pensionit të përcaktuar (shih SNK 26 *Kontabiliteti dhe Raportimi për Skemat e Përfitimeve për Pensione*).
 - (c) të drejtat kontraktuale ose detyrimet kontraktuale të cilat janë të kushtëzuara me përdorimin e ardhshëm ose të drejtën e përdorimit të një zëri jo-financiar (për shembull disa komisione licencash, të drejtash shfrytëzimi, pagesa të kushtëzuara të qirasë dhe zëra të ngjashëm) si dhe vlerën e mbetur të garancisë të një qiramarrësi të përfshirë në një qira financiare (shih SNK 16 *Qiratë*, SNK 15 *Të Ardhurat* dhe SNK 38 *Aktivët jo-materiale*).
 - (d) kontratat e garancisë financiare vetëm nëse lëshuesi ka pohuar më parë në mënyrë të qartë se i konsideron këto kontrata si kontrata sigurimi dhe ka përdorur kontabilitetin e zbatueshëm për kontratat e sigurimit, rast në të cilin lëshuesi mund të zgjedhë të zbatojë ose SNK 32, SNRF 7 dhe SNRF 9, ose këtë SNRF për kontrata të tilla të garancisë financiare. Lëshuesi mund të bëjë zgjedhjen kontratë për kontratë, por zgjedhja për secilën kontratë është e pakthyeshme.

- (e) shuma e kushtëzuar e pagueshme ose e arkëtueshme në një kombinim biznesi (shih SNRF 3 *Kombinimi i Bizneseve*).
 - (f) *kontratat direkte të sigurimit* që njësia ekonomike i mban (d.m.th. kontratat direkte të sigurimit në të cilën njësia ekonomike është *mbajtësi i policës së sigurimit*). Megjithatë një *cedues* duhet të zbatojë këtë SNRF për kontratat e ri siguruar që ai mban.
- 5 Për lehtësi referimi, ky SNRF përshkruan çdo njësi ekonomike që lëshon një kontratë sigurimi si një sigurues, pavarësisht nëse siguruesi shihet ose jo si një sigurues për qëllime ligjore ose mbikëqyrjeje. Të gjitha referencat në paragrafët 3 (a) -3 (b), 20A-20Q, 35B-35N, 39B-39M dhe 46-49 për një sigurues duhet të lexohen duke iu referuar edhe një emetuesi të një instrumenti financiar që përmban një tipar të pjesëmarrjes së lirë.
- 6 Një kontratë ri sigurimi është një tip kontrate sigurimi. Prandaj, të gjitha referencat në këtë SNRF për kontratat e sigurimit zbatohen edhe për kontratat e ri sigurimit.

Derivatvët e përfshirë

- 7 SNRF 9 kërkon që një njësi ekonomike të veçojë disa derivativë të përfshirë nga kontrata e tyre bazë, t'i masë ata me *vlerën e drejtë* dhe të përfshijë ndryshimet në vlerën drejtë të tyre në fitim ose humbje. SNRF 9 zbatohet për derivativët e përfshirë në një kontratë sigurimi me përjashtim të rastit kur derivativi i përfshirë është në vetvete një kontratë sigurimi.
- 8 Si një përjashtim i kërkesave në SNRF 9, një sigurues nuk ka nevojë të veçojë dhe të matë me vlerën e drejtë një opSION të policë mbajtësit për të dorëzuar një kontratë sigurimi për një shumë fikse (ose për një shumë të bazuar në një shumë fikse dhe një normë interesi), madje edhe nëse çmimi i ushtrimit ndryshon nga vlera kontabël e *detyrimit të sigurimit* bazë. Megjithatë, kërkesat në SNRF 9 zbatohen për një opSION për blerje ose një opSION të heqjes dorë në mjete monetare të përfshirë në një kontratë sigurimi nëse vlera e heqjes dorë ndryshon në përgjigje të ndryshimit në një treguesi financiar (të tilla si një çmim ose treguesi i bursës për instrumente të kapitalit ose mallrat), ose një tregues jo-financiar i cili nuk është specifik për një palë të kontratës. Për më tepër, këto kërkesa zbatohen edhe nëse aftësia e mbajtësit të policës së sigurimit për të ushtruar opSIONIN për blerje ose opSIONIN e heqjes dorë në mjete monetare buron nga një ndryshim në një variabël të tillë (për shembull, një opSION për blerje që mund të ushtrohet nëse një tregues i bursës së aksioneve arrin një nivel të caktuar).
- 9 Paragrafi 8 zbatohet njëjloj për opSIONET e dorëzimit të një instrumenti financiar që ka tiparin e pjesëmarrjes së lirë.

Veçimi i përbërësve të depozitës

- 10 Disa kontrata sigurimi përmbajnë edhe një përbërës sigurimi ashtu edhe një *përbërës depozite*. Në disa raste një siguruesi i kërkohet ose i lejohet të *veçojë* këta përbërës:
- (a) veçimi kërkohet nëse plotësohen njëkohësisht kushtet vijuese:
 - (i) siguruesi mund të matë përbërësin e depozitës (përfshirë çdo opSION dorëzimi të përfshirë) veças (d.m.th. pa marrë në konsideratë përbërësin e sigurimit).
 - (ii) politikat kontabël të siguruesit nuk kërkojnë që ai të njohë të gjithë detyrimet dhe të drejtat që vijnë nga përbërësit e depozitës.
 - (b) veçimi lejohet, por nuk kërkohet, nëse siguruesi mund të matë përbërësin e depozitës veças si në (a)(i) por politikat kontabël të tij kërkojnë që të njohë të gjitha detyrimet dhe të drejtat që vijnë nga përbërësi i depozitës, pavarësisht nga baza e përdorur për të matur këto të drejta dhe detyrime.
 - (c) veçimi ndalohet nëse një sigurues nuk mund të matë përbërësin e depozitës veças si në (a)(i).
- 11 Në vijim jepet një shembull i një rasti kur politikat kontabël të një siguruesi nuk kërkojnë që ai të njohë të gjitha detyrimet që rrjedhin nga një përbërës i depozitës. Një cedues merr kompensim për humbjet nga një *ri sigurues*, por kontrata detyron që ceduesi të shlyejë kompensimin në vitet e ardhshme. Ky detyrim rrjedh nga një përbërës i depozitës. Veçimi kërkohet kur politikat kontabël të ceduesit do të lejonin që ai të njohë kompensimin si të ardhur pa njohur detyrimin që rezulton.
- 12 Për të zbrëthyer një kontratë, një sigurues duhet të:
- (a) zbatojë këtë SNRF për përbërësin e sigurimit.
 - (b) zbatojë SNRF 9 për përbërësin e depozitës.

Njohja dhe matja

Përrjashtimi i përkohshëm nga disa SNRF të tjera

- 13 Paragrafët 10-12 të SNK 8 *Politikat kontabël, ndryshimet në vlerësimet kontabël dhe gabimet* specifikon kriterin që përdor një njësi ekonomike në zhvillimin e një politike kontabël kur asnjë SNRF nuk zbatohet në mënyrë specifike për një zë të caktuar. Megjithatë, ky SNRF përrjashton një sigures nga zbatimi i atyre kriterëve për politikën e tij kontabël për:
- (a) kontratat e sigurimit që ai lëshon (përfshirë kostot respektive të blerjes dhe aktivet jo materiale respektive, të tilla si ato të përshkruara në paragrafët 31 dhe 32); dhe
 - (b) kontratat e ri sigurimit që ai mban.
- 14 Megjithatë ky SNRF nuk përrjashton një sigures nga disa pasoja të kriterëve të dhëna në paragrafët 10-12 të SNK 8. Në mënyrë specifike një sigures:
- (a) nuk duhet të njohë si detyrim asnjë provizion për kërkesa të mundshme të ardhshme, nëse këto kërkesa vijnë nga kontrata sigurimi të cilat nuk ekzistojnë në fund të periudhës së raportimit (të tilla si provizionet për katastrofa dhe provizionet për balancim).
 - (b) duhet të kryejë *testin e mjaftueshmërisë së detyrimit* të përshkruar në paragrafët 15-19.
 - (c) duhet të heqë një detyrim të sigurimit (ose një pjesë e një detyrimi të sigurimit) nga pasqyra e tij e pozicionit financiar në qoftë se dhe vetëm në qoftë se, ai është shuar-d.m.th. kur detyrimi i specifikuar në kontratë çregjistrohet ose fshihet ose skadon.
 - (d) nuk duhet të kompensojë:
 - (i) *aktivet e ri sigurimit* kundrejt detyrimeve përkatëse të sigurimit; ose
 - (ii) të ardhurat ose shpenzimet nga kontratat e ri sigurimit kundrejt shpenzimeve ose të ardhurave nga kontratat respektive të sigurimit.
 - (e) duhet të marrë në konsideratë faktin nëse aktivet e tij të ri sigurimit janë zhvlerësuar (shih paragrafin 20).

Testi i mjaftueshmërisë së detyrimeve

- 15 Një sigures duhet të vlerësojë në fund të çdo periudhe raportuese nëse detyrimet e tij të njohura të sigurimit janë të mjaftueshme, duke përdorur vlerësime aktuale të flukseve të ardhshme të mjeteve monetare sipas kontratave të tij të sigurimit. Nëse ky vlerësim tregon se vlera kontabël e detyrimeve të tij të sigurimit (minus kostot respektive të shtyra të blerjes dhe aktivet respektive jo materiale, të tilla si ato të trajtuara në paragrafët 31 dhe 32) është e pamjaftueshme duke marrë parasysh flukset e ardhshme të mjeteve monetare, e gjithë pamjaftueshmëria duhet të njihet në fitim ose humbje.
- 16 Nëse një sigures zbaton një test të mjaftueshmërisë së detyrimeve, i cili plotëson kërkesat minimale të specifikuara, ky SNRF nuk detyron plotësimin e kërkesave të tjera. Kërkesat minimale janë si vijon:
- (a) Testi merr në konsideratë vlerësimet aktuale të të gjitha flukseve të mjeteve monetare kontraktuale dhe të flukseve të mjeteve monetare përkatëse të tilla si kostot e shqyrtimit të kërkesave, ashtu si dhe flukset monetare që vijnë nga opsionet e përfshirë dhe garancitë.
 - (b) Nëse testi tregon se detyrimi është i pamjaftueshëm, e gjithë pamjaftueshmëria njihet në fitim ose humbje.
- 17 Nëse politikën kontabël të një siguresi nuk kërkojnë një test të mjaftueshmërisë së detyrimit i cili plotëson kërkesat minimale të paragrafit 16, siguresi duhet të:
- (a) përcaktojë vlerën kontabël të detyrimeve përkatëse të sigurimit¹ minus vlerën kontabël të:
 - (i) çdo kostoje përkatëse të shtyrë të blerjes; dhe
 - (ii) çdo aktivi jo-material respektiv, të tilla si ato të blera në një kombinim biznesi ose transferim portofoli (shih paragrafët 31 dhe 31). Megjithatë aktivet përkatëse të ri

¹

Detyrime sigurimi të përshtatshme janë ato detyrime sigurimi (dhe kosto përkatëse e blerjes e shtyrë dhe aktivet përkatëse jo-materiale) për të cilat politikën kontabël të siguresit nuk kërkojnë kryerjen e një testi të mjaftueshmërisë së detyrimeve që plotëson kërkesat minimale të paragrafit 16.

sigurimit nuk merren në konsideratë, sepse një sigures i trajton ato veças (shih paragrafin 20).

- (b) përcaktojë nëse shuma e përshkruar në (a) është më e vogël se vlera kontabël që do të kërkohej nëse detyrimet përkatëse të sigurimit do të ishin brenda objektit të SNK 37. Nëse është më e vogël, siguresi duhet të njohë të gjithë diferencën në fitim ose në humbje dhe të pakësojë vlerën kontabël të kostove përkatëse të shtyra të blerjes ose aktiveve jo-materiale përkatëse, ose të rrisë vlerën kontabël të detyrimeve kryesore të sigurimit.
- 18 Nëse testi i mjaftueshmërisë së detyrimeve të një siguresi plotëson kërkesat minimale të paragrafit 16, testi zbatohet në nivelin e bashkimit të specifikuar për atë test. Nëse testi i tij i mjaftueshmërisë së detyrimeve nuk plotëson kërkesat minimale, krahasimi i përshkruar në paragrafin 17 duhet të bëhet në nivelin e një portofoli kontratash, të cilat janë subjekt i rreziqeve mjaft të ngjashme dhe menaxhohen së bashku si një portofol i vetëm.
- 19 Shuma e përshkruar në paragrafin 17(b) (d.m.th. rezultati i zbatimit të SNK 37) duhet të pasqyrojë marzhet e ardhshme të investimit (shih paragrafët 27-29) në qoftë se dhe vetëm në qoftë se, shuma e përshkruar në paragrafin 17(a) gjithashtu pasqyron këto marzhe.

Zhvlerësimi i aktiveve të ri sigurimit

- 20 Nëse një aktiv i risiguruar i një ceduesi është zhvlerësuar, ceduesi duhet të pakësojë vlerën kontabël të tij në përputhje me rrethanat dhe të njohë këtë humbje nga zhvlerësimi në fitim ose humbje. Një aktiv i risiguruar zhvlerësohet nëse dhe vetëm nëse:
- (a) ka evidencë objektive, e cila rrjedh nga një ngjarje që ka ndodhur pas njohjes fillestare të aktivit të ri sigurimit, se ceduesi mund të mos marrë të gjitha shumat që i detyrohen atij sipas kushteve të kontratës; dhe
- (b) ngjarja ka një ndikim të matshëm në mënyrë të besueshme mbi shumat që ceduesi do të marrë nga ri siguresi.

Përfashtime të përkohshme nga SNRF 9

- 20A SNRF 9 trajton kontabilitetin për instrumentet financiare dhe zbatohet për periudhat vjetore që fillojnë në 1 janar 2018 ose më pas. Megjithatë, për një sigures që plotëson kriteret në paragrafin 20B, ky SNRF jep një përfashtim të përkohshëm që lejon, por nuk kërkon, që siguresi të zbatojë SNK 39 *Instrumentet Financiare: Njohja dhe Matja* dhe jo SNRF 9, për periudhat vjetore që fillojnë përpara datës 1 janar 2021. Një sigures që do të aplikojë përfashtimin e përkohshëm nga SNRF 9 duhet të:
- (a) përdorë kërkesat e SNRF 9 që janë të nevojshme për të siguruar dhënien e informacioneve shpjeguese të kërkuara në paragrafët 39B-39J të kësaj SNRF-je; dhe
- (b) zbatojë të gjitha SNRF-të e tjera të aplikueshme për instrumentet e saj financiare, me përfashtim siç përshkruhet në paragrafët 20A-20Q, 39B-39J dhe 46-47 të kësaj SNRF-je.
- 20B Një sigures mund të zbatojë përfashtimin e përkohshëm nga SNRF 9, nëse, dhe vetëm nëse:
- (a) ai nuk ka aplikuar më parë ndonjë version të SNRF 9², që ndryshojnë vetëm nga kërkesat në paragrafët 5.7.1 (c), 5.7.7-5.7.9, 7.2.14 dhe B5.7.5-B5.7.20 të SNRF 9 për paraqitjen e fitimeve dhe humbjeve në detyrimet financiare të përcaktuara me vlerë të drejtë përmes fitimit ose humbjes; dhe
- (b) aktivitetet e tij janë të lidhura kryesisht me sigurimin, siç përshkruhet në paragrafin 20D, në datën e raportimit vjetor që i paraprin menjëherë datës 1 Prill 2016, ose në një datë të mëvonshme të raportimit vjetor siç është specifikuar në paragrafin 20G.
- 20C Një sigures që zbaton përfashtim e përkohshëm nga SNRF 9 i lejohej të zgjedhë të zbatojë vetëm kërkesat në paragrafët 5.7.1 (c), 5.7.7-5.7.9, 7.2.14 dhe B5.7.5-B5.7.20 të SNRF 9 për paraqitjen e fitimeve dhe humbjeve në detyrimet financiare të përcaktuara me vlerë të drejtë përmes fitimit ose humbjes. Nëse një njësi ekonomike zgjedh që të zbatojë vetëm paragrafët më sipër, ajo duhet të japë informacion shpjegues mbi këtë fakt dhe duhet të sigurojë në mënyrë të vazhdueshme dhënien e informacioneve shpjeguese të përcaktuara në paragrafët 10-11 të SNRF 7 (ndryshuar me SNRF 9, (2010)).
- 20D Aktivitetet e një siguresi janë të lidhura kryesisht me sigurimin, nëse, dhe vetëm nëse:

- (a) vlera kontabël e detyrimeve që rrjedhin nga kontratat brenda objektit të kësaj SNRF-je, e cila përfshin përbërës të depozitave apo derivativë të përfshirë, që trajtohen veçmas nga kontratat e sigurimit që aplikojnë paragrafët 7-12 të kësaj SNRF-je, është e rëndësishme në krahasim me vlerën kontabël neto gjithsej të të gjitha detyrimeve të saj; dhe
- (b) përqindja e shumës totale kontabël të detyrimeve të saj lidhur me sigurimin (shih paragrafin 20E) në lidhje me shumën totale kontabël të të gjitha detyrimeve të saj, është:
- (i) më e madhe se 90 për qind; ose
 - (ii) më pak se ose e barabartë me 90 për qind, por më e madhe se 80 për qind, dhe siguresi nuk do të angazhohet në një aktivitet të rëndësishëm të pa lidhur me sigurimin (shih paragrafin 20F).
- 20E Për qëllime të aplikimit të paragrafit 20D (b), detyrimet që janë të lidhura me sigurimin përbëhen nga:
- (a) detyrimet që rrjedhin nga kontratat brenda objektit të kësaj SNRF-je, siç përshkruhet në paragrafin 20D (a);
 - (b) detyrimet për kontrata investimi jo-derivative të matura me vlerën e drejtë nëpërmjet fitimit ose humbjes që zbaton SNK 39 (duke përfshirë dhe ato të përcaktuara si me vlerë të drejtë nëpërmjet fitimit ose humbjes për të cilat siguresi ka aplikuar kërkesat e SNRF 9 për paraqitjen e fitimeve dhe humbjeve (shih paragrafët 20B (a) dhe 20C)); dhe
 - (c) detyrimet që lindin për shkak se siguresi emeton, ose përmbush detyrimet që rrjedhin nga kontratat në pikat (a) dhe (b). Shembuj të detyrimeve të tilla përfshijnë derivativë që përdoren për të zbutur rreziqet që dalin nga këto kontrata dhe nga aktivet që mbështesin ato kontrata, detyrimet përkatëse tatimore të tilla si detyrimet për tatime të shtyra për diferencat e përkohshme të tatueshme mbi detyrimet që rrjedhin nga këto kontrata, dhe instrumentet e borxhit të emetuara të cilat janë të përfshira në kapitalin rregullator të siguresit.
- 20F Në vlerësimin nëse siguresi angazhohet në një aktivitet të rëndësishëm të pa lidhur me sigurimin për qëllime të zbatimit të paragrafit 20D (b) (ii), një siguresi duhet të marrë në konsideratë:
- (a) vetëm ato aktivitete nga të cilat mund të fitojë të ardhura dhe bëjë shpenzime; dhe
 - (b) faktorët sasiore ose cilësorë (ose të dy së bashku), duke përfshirë dhe informacion publik disponibël siç është klasifikimi i sektorëve ekonomik që zbatojnë përdoruesit e pasqyrave financiare për siguresin.
- 20G Paragrafi 20B (b) kërkon që një njësi ekonomike të vlerësojë nëse ajo kualifikohet për përjashtim të përkohshëm nga SNRF 9 në datën e raportimit vjetor që i paraprin menjëherë datës 1 prill 2016. Pas datës së kushtëzimit
- (a) një njësi ekonomike e kualifikuar më parë për përjashtimin e përkohshëm nga SNRF 9 do të rivlerësojë nëse aktivitetet e saj janë të lidhura kryesisht me sigurimin në një datë të mëpasshme të raportimit vjetor nëse, dhe vetëm nëse, ka pasur një ndryshim në aktivitetet e njësisë ekonomike, siç përshkruhet në paragrafët 20H-20I , gjatë periudhës vjetore që përfundoi në atë datë.
 - (b) një njësi ekonomike e pa kualifikuar më parë për përjashtimin e përkohshëm nga SNRF 9, i lejohet të rivlerësojë nëse aktivitetet e saj janë të lidhura kryesisht me sigurimin për një datë të mëpasshme të raportimit vjetor, përpara datës 31 dhjetor 2018 nëse, dhe vetëm nëse, ka patur një ndryshim në aktivitetet e njësisë ekonomike, siç përshkruhet në paragrafët 20H-20I , gjatë periudhës vjetore që përfundoi në atë datë.
- 20H Për qëllime të aplikimit të paragrafit 20G, një ndryshim në aktivitetet e një njësie ekonomike është një ndryshim që:
- (a) përcaktohet nga drejtuesit e lartë të njësisë ekonomike, si rezultat i ndryshimeve të jashtme ose të brendshme;
 - (b) është i rëndësishëm për operacionet e njësisë ekonomike; dhe
 - (c) është i provueshëm dhe i dukshëm për palët e jashtme.
- Prandaj, një ndryshim i tillë ndodh vetëm kur njësi ekonomike fillon ose ndërpret kryerjen e një aktiviteti që është i rëndësishëm për operacionet e saj, ose në mënyrë të konsiderueshme ndryshon madhësinë e një prej aktiviteteve të saj; për shembull, kur njësi ekonomike ka blerë, ka shitur ose ka ndërprerë një linjë të biznesit.

- 20I Një ndryshim në aktivitetet e një njësie ekonomike, siç përshkruhet në paragrafin 20H, pritet të jetë shumë i rrallë. Ndryshimet e përmendura më poshtë nuk janë ndryshime në aktivitetet e një njësie ekonomike për qëllime të aplikimit të paragrafit 20G:
- (a) një ndryshim në strukturën e financimit të njësisë ekonomike i cili në vetvete nuk ndikon aktivitetet nga të cilat njësia ekonomike përfiton të ardhura dhe kryen shpenzime.
 - (b) plani i njësisë ekonomike për të shitur një linjë të biznesit, edhe në qoftë se aktivet dhe detyrimet janë klasifikuar si të mbajtura për shitje që aplikon SNRF 5 *Aktivitet Afatgjatë që Mbahen për Shitje dhe Veprimtaritë e Ndërprera*. Një plan për të shitur një linjë të biznesit mund të ndryshojë aktivitetet e njësisë ekonomike dhe të çojë në një rivlerësim në të ardhmen, por ende nuk ka ndikuar në detyrimet e njohura në pasqyrën e pozicionit financiar.
- 20J Nëse një njësi ekonomike si rezultat i rivlerësimit nuk kualifikohet për me tej për një përjashtim të përkohshëm nga SNRF 9 (shih paragrafin 20G (a)), atëherë njësia ekonomike lejohet të vazhdojë të aplikojë përjashtimin e përkohshëm nga SNRF 9 vetëm deri në fund të periudhës vjetore raportuese që fillon menjëherë pas këtij rivlerësimi. Një njësi ekonomike duhet të zbatojë këtë SNRF për periudhat vjetore që fillojnë më datën 1 janar 2013 e në vijim. Për shembull, në qoftë se një njësi ekonomike duke aplikuar paragrafin 20G (a) më 31 dhjetor 2018 (fundi i periudhës së saj vjetore), përcakton se ajo nuk kualifikohet për më tej për përjashtim të përkohshëm nga SNRF 9, atëherë njësia ekonomike lejohet të vazhdojë të zbatojë përjashtim të përkohshëm nga SNRF 9 vetëm deri më 31 dhjetor 2019.
- 20K Një sigures i cili ka zgjedhur më parë të aplikojë përjashtimin e përkohshëm nga SNRF 9 në fillim të çdo periudhe të mëvonshme vjetore mund të zgjedhë të zbatojë SNRF 9 në mënyrë të përvokueshme.

Adoptues për herë të parë

- 20L Një adoptues për herë të parë, siç përcaktohet në SNRF 1 *Adoptimi për herë të parë i Standardeve Ndërkombëtare të Raportimit Financiar*, mund të aplikojë përjashtimin e përkohshëm nga SNRF 9 të përshkruar në paragrafin 20A nëse, dhe vetëm nëse, ai i plotëson kriteret e përshkruara në paragrafin 20B. Për zbatimin e paragrafit 20B (b), adoptuesi për herë të parë do të përdorë vlerat kontabël të përcaktuara duke aplikuar SNRF-të në datën e përcaktuar në këtë paragraf.
- 20M SNRF1 përmban kërkesat dhe përjashtimet të aplikueshme për një adoptues për herë të parë. Këto kërkesa dhe përjashtime (për shembull, paragrafët D16-D17 të SNRF 1) nuk i përjashtojnë kërkesat në paragrafët 20A-20Q dhe 39B-39J të kësaj SNRF-je. Për shembull, kërkesat dhe përjashtimet në SNRF 1 nuk e përjashtojnë kërkesën që një adoptues për herë të parë do të plotësojë kriteret e përcaktuara në paragrafin 20L për të aplikuar përjashtim të përkohshëm nga SNRF 9.
- 20N Një adoptues për herë të parë që jep informacion shpjegues për informacionin e kërkuar nga paragrafët 39B-39J do të përdorë kërkesat dhe përjashtimet e SNRF 1 të cilat janë të përshtatshme për të bërë vlerësimet e nevojshme për këto informacione shpjeguese.

Përjashtim i përkohshëm nga kërkesat e veçanta të SNK 28

- 20O Paragrafët 35-36 të SNK 28 *Investimet në pjesëmarrje dhe sipërmarrjet e përbashkëta*, kërkojnë që një njësi ekonomike të zbatojë politika kontabël uniforme kur përdor metodën e kapitalit neto. Megjithatë, për periudhat që fillojnë para datës 1 janar 2021, një njësi ekonomike i lejohet, por nuk i kërkohet, të mbajë të njëjtat politika përkatëse të kontabilitetit të zbatuara nga pjesëmarrjet ose sipërmarrjet e përbashkëta si më poshtë:
- (a) njësia ekonomike aplikon SNRF 9, por pjesëmarrja ose sipërmarrja e përbashkët aplikon përjashtim të përkohshëm nga SNRF 9; ose
 - (b) njësia ekonomike aplikon përjashtimin e përkohshëm nga SNRF 9, por pjesëmarrja ose sipërmarrja e përbashkët zbaton SNRF 9.
- 20P Kur një njësi ekonomike përdor metodën e kapitalit neto për të llogaritur investimin e saj në një pjesëmarrje ose sipërmarrje të përbashkët:
- (a) nëse SNRF 9 ka qenë aplikuar më herët në pasqyrat financiare që kanë përdorur më parë metodën e kapitalit neto në atë pjesëmarrje ose sipërmarrje të përbashkët (pasi janë reflektuar ndryshimet e bëra nga njësia ekonomike), atëherë SNRF 9 do të vazhdojë të zbatohet.
 - (b) nëse përjashtimi i përkohshëm nga SNRF 9 është aplikuar më parë në pasqyrat financiare që kanë përdorur më parë metodën e kapitalit neto në atë pjesëmarrje ose sipërmarrje të përbashkët pasi janë reflektuar ndryshimet e bëra nga njësia ekonomike), atëherë SNRF 9 mund të zbatohet më vonë.

- 20Q Një njësi ekonomike mund të zbatojë paragrafët 20O dhe 20P (b) veçmas për çdo pjesëmarrje ose sipërmarrje të përbashkët.

Ndryshimet në politikat kontabël

- 21 Paragrafët 22-30 zbatohen si për ndryshimet e bëra nga një sigurues që tashmë zbaton SNRF-të, ashtu dhe për ndryshimet e bëra nga një sigurues që zbaton për herë të parë SNRF-të.
- 22 **Një sigurues mund të ndryshojë politikat e tij kontabël për kontratat e sigurimit nëse dhe vetëm nëse ndryshimet i bëjnë pasqyrat financiare më të përshtatshme për nevojat e vendimmarrjes së përdoruesve dhe jo më pak të besueshme, ose më të besueshme dhe jo më pak të përshtatshme për këto nevoja. Një sigurues duhet të gjykojë përshtatshmërinë dhe besueshmërinë sipas kriterëve që janë dhënë në SNK 8.**
- 23 Për të justifikuar politikat e tij kontabël për kontratat e sigurimit, një sigurues duhet të tregojë se ndryshimi i sjell pasqyrat e tij financiare më afër me plotësimin e kriterëve në SNK 8, por ndryshimi nuk ka nevojë që të arrijë pajtueshmëri të plotë me këto kritere. Më poshtë janë trajtuar këto çështje specifike:
- (a) normat aktuale të interesit (paragrafi 24);
 - (b) vazhdimi i praktikave ekzistuese (paragrafi 25);
 - (c) kujdesi (paragrafi 26);
 - (d) marzhet e ardhshme të investimit (paragrafët 27-29); dhe
 - (e) kontabiliteti hije (paragrafi 30).

Normat aktuale të interesit të tregut

- 24 Një sigurues lejohet, por nuk i kërkohet, të ndryshojë politikat e tij kontabël kështu që ai i rimat detyrimet e sigurimit të klasifikuara³, për të reflektuar normat aktuale të interesit të tregut dhe i njeh ndryshimet në këto detyrime në fitim ose humbje. Në të njëjtën kohë, ai mund të përdorë edhe politika kontabël të cilat kërkojnë vlerësime dhe supozime të tjera aktuale për detyrimet e klasifikuara. Zgjedhja në këtë paragraf lejon një sigurues të ndryshojë politikat e tij kontabël për detyrimet e klasifikuara, pa zbatuar këto politika në mënyrë të qëndrueshme për të gjitha detyrimet e ngjashme siç do të kërkonte ndryshe SNK 8. Nëse një sigurues përcakton detyrimet për këtë zgjedhje ai duhet të vazhdojë të zbatojë normat aktuale të interesit të tregut (dhe, nëse është e zbatueshme, vlerësimet dhe supozimet e tjera aktuale) në mënyrë të qëndrueshme në të gjitha periudhat për të gjitha këto detyrime derisa ato të jenë shlyer.

Vazhdimi i praktikave ekzistuese

- 25 Një sigurues mund të vazhdojë praktikën në vijim, por përdorimi i ndonjëres prej tyre nuk plotëson paragrafin 22:
- (a) matjen e detyrimeve të sigurimit mbi një bazë të paskontuar.
 - (b) matjen e të drejtave kontraktuale për tarifat e menaxhimit të investimeve të ardhshme me një shumë e cila tejkalon vlerën e drejtë të tyre siç nënkuptohet nga një krahasim me tarifat aktuale që përdoren nga pjesëmarrësit e tjerë të tregut për shërbime të ngjashme. Ka të ngjarë që vlera e drejtë në krijimin e këtyre të drejtave kontraktuale të barazojë kostot fillestare të paguara, me përjashtim të rastit kur komisionet e menaxhimit të investimeve të ardhshme dhe kostot e lidhura, janë jashtë linjës së të krahasueshmeve të tregut.
 - (c) përdorimi i politikave kontabël jo-uniforme për kontratat e sigurimit (dhe kostot e shtyra të lidhura me blerjen dhe aktivet jo-materiale të lidhura, nëse ka) të filialeve, me përjashtim të sa lejohet nga paragrafi 24. Nëse këto politika kontabël nuk janë uniforme, një sigurues mund t'i ndryshojë ato, nëse ndryshimi nuk i bën politikat kontabël më të ndryshme dhe gjithashtu plotëson kërkesat e tjera në këtë SNRF.

3

Në këtë paragraf, detyrimet e sigurimit përfshijnë kostot e blerjes të shtyra dhe aktivet jo-materiale, siç janë ato të trajtuara në paragrafët 31 dhe 32.

Kujdesi

- 26 Një sigures nuk ka nevojë që për të eliminuar kujdesin e tepërt, të ndryshojë politikat e tij kontabël për kontratat e sigurimit. Megjithatë nëse një sigures tashmë mat kontratat e tij të sigurimit me kujdes të mjaftueshëm, ai nuk duhet të tregojë kujdes shtesë.

Marzhet e ardhshme të investimit

- 27 Një sigures nuk ka nevojë të ndryshojë politikat e tij kontabël për kontratat e sigurimit për të eliminuar marzhet e ardhshme të investimit. Megjithatë ka një supozim të kundërshtueshëm se pasqyrat financiare të një siguresi do të bëhen më pak të përshtatshme dhe të besueshme, nëse ai përdor një politikë kontabël e cila pasqyron marzhet e ardhshme të investimit në matjen e kontratave të sigurimit, me përjashtim të rastit kur këto marzhe ndikojnë pagesat kontraktuale. Dy shembuj të politikave kontabël që pasqyrojnë këto marzhe janë:

- (a) përdorimi i një normë skontimi e cila pasqyron kthimin e vlerësuar mbi aktivet e siguresit; ose
- (b) projektimi i kthimeve në këto aktive me një normë të vlerësuar kthimi, duke i skontuar këto kthime të parashikuara me një normë të ndryshme dhe duke përfshirë rezultatin në matjen e detyrimit.

- 28 Një sigures mund të kapërcejë supozimin e kundërshtueshëm të përshkruar në paragrafin 27, nëse dhe vetëm nëse, përbërësit e tjerë të një ndryshimi në politikat kontabël, shtojnë përshtatshmërinë dhe besueshmërinë e pasqyrave financiare të tij në mënyrë të mjaftueshme për të tejkaluar rënien e përshtatshmërisë dhe besueshmërisë të shkaktuar nga përfshirja e marzheve të ardhshme të investimit. Për shembull, supozoni se politikat kontabël ekzistuese të një siguresi për kontratat e sigurimit përfshijnë supozime të tepërta kujdesi, të bëra qysh në krijim, dhe një normë skontimi të përcaktuar nga një rregullator pa referim të drejtpërdrejtë në kushtet e tregut dhe nuk marrin parasysh disa opsione të përfshira dhe garancitë. Siguresi mund t'i bëjë pasqyrat e tij financiare më të përshtatshme dhe jo më pak të besueshme duke kaluar në një bazë kontabël më të përgjithshme të orientuar nga investitori e cila përdoret gjerësisht dhe përfshin:

- (a) vlerësimet dhe supozimet aktuale;
- (b) një rregullim të arsyeshëm (por jo së tepërmi të kujdesshëm) për të pasqyruar rrezikun dhe pasigurinë;
- (c) matjet që pasqyrojnë si vlerën e brendshme dhe vlerën në kohë të opsioneve të përfshira dhe garancive; dhe
- (d) një normë skontimi aktuale të tregut, madje edhe nëse kjo normë skontimi pasqyron kthimin e vlerësuar mbi aktivet e siguresit.

- 29 Në disa metoda matjeje, norma e skontimit përdoret për të përcaktuar vlerën aktuale të marzhit të ardhshëm të fitimit. Marzhi i fitimit më pas i ngarkohet periudhave të ndryshme duke përdorur një formulë. Në këto metoda, norma e skontimit ndikon matjen e detyrimit vetëm në mënyrë indirekte. Veçanërisht përdorimi i një norme skontimi më pak të përshtatshme ka pak ose aspak efekt në matjen e detyrimit në kohën e krijimit të tij. Megjithatë, në metodat e tjera, norma e skontimit përcakton matjen e detyrimit në mënyrë direkte. Në rastin e fundit, për shkak se përdorimi i një norme skontimi të bazuar në aktiv ka një efekt më të rëndësishëm, ka pak mundësi që një sigures të mund të kapërcejë supozimin e kundërshtueshëm të paragrafit 27.

Kontabiliteti hije

- 30 Në disa modele kontabël, fitimet ose humbjet e realizuara në aktivet e një siguresi kanë një efekt direkt në matjen e disa ose të gjitha (a) detyrimeve të tij të sigurimit, (b) kostove të shtyra të lidhura me blerjen dhe (c) aktiveve përkatëse jo-materiale, të tilla si ato të përshkruara në paragrafët 31 dhe 32. Një siguresi i lejohet por nuk i kërkohet që të ndryshojë politikat e tij kontabël me qëllim që një fitim ose humbje e njohur, por jo e realizuar mbi një aktiv, të ndikojë këto matje në të njëjtën mënyrë si një fitim ose humbje e realizuar. Rregullimi lidhur me detyrimin e sigurimit (ose kostot e shtyra të blerjes ose aktivet jo-materiale) duhet të njihet në pasqyrën e të ardhurave gjithëpërfshirëse nëse dhe vetëm nëse fitimet ose humbjet e përealizuara njihen në pasqyrën e të ardhurave gjithëpërfshirëse. Kjo praktikë ndonjëherë përshkruhet si 'kontabiliteti hije'.

Kontratat e sigurimit të blera në një kombinim biznesi ose në një transferim portofoli

- 31 Për të plotësuar kërkesat e SNRF 3, në datën e blerjes një sigures duhet të masë me vlerën e drejtë detyrimet e sigurimit të marra dhe *aktivet e sigurimit* të blera në një kombinim biznesi. Megjithatë një siguresi i lejohet por nuk i kërkohet të përdorë një paraqitje të zgjeruar e cila ndan vlerën e drejtë të kontratave të sigurimit të blera në dy përbërës:
- (a) një detyrim i matur në përputhje me politikat kontabël të siguresit për kontratat e sigurimit që ai lëshon; dhe
 - (b) një aktiv jo-material, që përfaqëson diferencën mes (i) vlerës së drejtë të të drejtave kontraktuale të sigurimit të përfutura dhe detyrimeve të sigurimit të marra dhe (ii) shumës së përshkruar në (a). Matja e mëpasshme e këtij aktivi duhet të jetë e qëndrueshme me matjen e detyrimeve përkatëse të sigurimit.
- 32 Një sigures që blen një portofol të kontratave të sigurimit mund të përdorë paraqitjen e zgjeruar të përshkruar në paragrafin 31.
- 33 Aktivet jo-materiale të përshkruara në paragrafët 31 dhe 32 përjashtohen nga objekti i SNK 36 *Zhvlerësimi i aktiveve* dhe SNK 38. Megjithatë SNK 36 dhe SNK 38 zbatohen për listat e klientëve dhe marrëdhëniet e klientëve që pasqyrojnë pritshmëritë për kontratat e ardhshme, të cilat nuk janë pjesë e të drejtave kontraktuale të sigurimit dhe detyrimeve kontraktuale të sigurimit, që ekzistojnë në datën e një kombinimi biznesesh ose transferimi portofoli.

Tiparet e pjesëmarrjes së lirë

Tiparet e pjesëmarrjes së lirë në kontratat e sigurimit

- 34 Disa kontrata sigurimi përmbajnë një tipar pjesëmarrjeje të lirë si edhe një *element të garantuar*. Lëshuesi i një kontrate të tillë:
- (a) mundet, por nuk ka nevojë, të njohë elementin e garantuar veças nga tipari i pjesëmarrjes së lirë. Nëse lëshuesi nuk i njeh ato veças, ai duhet të klasifikojë të gjithë kontratën si një detyrim. Nëse lëshuesi i klasifikon ato veças, ai duhet të klasifikojë elementin e garantuar si një detyrim.
 - (b) nëse njeh tiparin e pjesëmarrjes së lirë veças elementit të garantuar, duhet të klasifikojë këtë tipar ose si një detyrim ose si një përbërës të veçantë të kapitalit. Ky SNRF nuk specifikon mënyrën se si lëshuesi përcakton nëse ky tipar është një detyrim ose kapital. Lëshuesi mund të ndajë këtë tipar në përbërës të detyrimit dhe kapitalit dhe duhet të përdorë një politikë kontabël të qëndrueshme për këtë ndarje. Lëshuesi nuk duhet të klasifikojë këtë tipar si një kategori të ndërmjetme, e cila nuk është as detyrim, as kapital.
 - (c) mund të njohë të gjitha primet e marra si të ardhura pa veçuar ndonjë pjesë që lidhet me përbërësin e kapitalit. Ndryshimet e rezultuara në elementin e garantuar dhe në pjesën e tiparit të pjesëmarrjes së lirë të klasifikuar si një detyrim duhet të njihen në fitim ose humbje. Nëse një pjesë ose gjithë tipari i pjesëmarrjes së lirë klasifikohet në kapital, një pjesë e fitimit ose humbjes mund t'i takojë atij tipari (në të njëjtën mënyrë që një pjesë mund t'i takojë interesave të pakicës). Lëshuesi duhet të njohë pjesën e fitimit ose humbjes që i takon çdo përbërësi të kapitalit të një tipari të pjesëmarrjes së lirë, si një shpërndarje e fitimit ose humbjes, e jo si shpenzim ose e ardhur (shih SNK 1 *Paraqitja e pasqyrave financiare*).
 - (d) nëse kontrata përmban një derivativ të përfshirë, i cili është brenda objektit të SNRF 9, për këtë derivativ të përfshirë duhet të zbatohet SNRF 9.
 - (e) për të gjitha aspektet që nuk janë përshkruar në paragrafët 14-20 dhe 34(a)-(d), duhet të vazhdojë politikat e tij kontabël ekzistuese për këto kontrata, me përjashtim të rastit kur ai ndryshon këto politika kontabël, në një mënyrë që pajtohet me paragrafët 21-30.

Tiparet e pjesëmarrjes së lirë në instrumentet financiarë

- 35 Kërkesat e paragrafit 34 zbatohen gjithashtu edhe për një instrument financiar që përmban një tipar të pjesëmarrjes së lirë. Veç kësaj:

- (a) nëse lëshuesi klasifikon të gjithë tiparin e pjesëmarrjes së lirë si një detyrim, ai duhet të zbatojë testin e mjaftueshmërisë së detyrimeve të paragrafëve 15-19, për të gjithë kontratën (d.m.th. si për elementin e garantuar, ashtu edhe për tiparin e pjesëmarrjes së lirë). Lëshuesi nuk ka nevojë të përcaktojë shumën që do të vijë nga zbatimi i SNRF 9 për elementin e garantuar.
 - (b) nëse lëshuesi klasifikon një pjesë ose të gjithë tiparin si një përbërës të veçantë të kapitalit, detyrimi i njohur për të gjithë kontratën nuk duhet të jetë më pak se shuma që do të rezultonte nga zbatimi i SNRF 9 për elementin e garantuar. Kjo shumë duhet të përfshijë vlerën e perceptuar të një opsioni për heqjen dorë nga kontrata, por nuk ka nevojë të përfshijë vlerën në kohë, nëse paragrafi 9 përjashton këtë opsion nga matja me vlerën e drejtë. Lëshuesi nuk ka nevojë të japë informacion shpjegues për shumën që do të vijë nga zbatimi i SNRF 9 për elementin e garantuar dhe as ta paraqesë atë shumë veças. Për më tepër, lëshuesi nuk ka nevojë të përcaktojë këtë shumë nëse detyrimet totale të njohura janë qartësisht më shumë.
 - (c) megjithëse këto kontrata janë instrumente financiarë, lëshuesi mund të vazhdojë të njohë primet për këto kontrata si të ardhura, dhe rritjen që vjen në vlerën kontabël të detyrimit ta njohë si një shpenzim.
 - (d) megjithëse këto kontrata janë instrumente financiarë, një lëshues që zbaton paragrafin 20(b) të SNRF 7 për kontratat me një tipar pjesëmarrjeje të lirë, duhet të japë informacion shpjegues për shpenzimet gjithsej të interesit të njohura në fitim ose humbje, por nuk ka nevojë të llogarisë këto shpenzime interesi duke përdorur metodën e interesit efektiv.
- 35A Përjashtimet e përkohshme në paragrafët 20A, 20L dhe 20O dhe metoda e veçantë në paragrafin 35B janë gjithashtu në dispozicion për një emetues të një instrumenti financiar që përmban një tipar pjesëmarrjeje të lirë. Prandaj, të gjitha referencat në paragrafët 3 (a) -3 (b), 20A-20Q, 35B-35N, 39B-39M dhe 46-49 për një sigurues duhet të lexohen sikur t'i referoheshin edhe një emetuesi të një instrumenti financiar që përmban një tipar pjesëmarrjeje të lire.

Paraqitja

Metoda e paraqitjes e veçantë

- 35B Një sigurues lejohet, por nuk i kërkohet, të zbatojë metodën e veçantë për aktiveve financiare të përcaktuara si të tilla. Një sigurues që zbaton metodën e veçantë do të:
- (a) të riklasifikojë midis fitimit ose humbjes dhe të ardhurave të tjera gjithëpërfshirëse një shumë që rezulton në fitim ose humbje në fund të periudhës raportuese për aktivet financiare të përcaktuara të tilla njëloj sikur siguruesi të kishte zbatuar SNK 39 për të njëjtat aktivet financiare të përcaktuara. Prandaj, shuma e riklasifikuar është e barabartë me diferencën midis:
 - (i) shumës së raportuar në fitim ose humbje për aktivet financiare të përcaktuara të tilla nga aplikimi i SNRF 9; dhe
 - (ii) shumës që do të ishte raportuar në fitim ose humbje për aktivet financiare të përcaktuara të tilla, në qoftë se siguruesi do të kishte aplikuar SNK 39.
 - (b) të zbatojë të gjitha SNRF-të e tjera të zbatueshme për instrumentet e tij financiare, me përjashtim siç përshkruhet në paragrafët 35B-35N, 39K-39M dhe 48-49 të kësaj SNRF-je.
- 35C Një sigurues mund të zgjedhë të aplikojë metodën e veçantë të përshkruar në paragrafin 35B vetëm kur ai zbaton për herë të parë SNRF 9, duke përfshirë këtu edhe rastin kur zbaton SNRF 9 për herë të parë pasi më herët ka zbatuar :
- (a) përjashtimin e përkohshëm nga SNRF 9, të përshkruar në paragrafin 20A; ose
 - (b) vetëm kërkesat për paraqitjen e fitimeve dhe humbjeve në detyrimet financiare të përcaktuara me vlerë të drejtë përmes fitimit ose humbjes që jepen në paragrafët 5.7.1 (c), 5.7.7-5.7.9, 7.2.14 dhe B5.7.5-B5.7.20 të SNRF 9
- 35D Një sigurues do të paraqesë shumën e riklasifikuar midis fitimit ose humbjes dhe të ardhurave të tjera gjithëpërfshirëse duke aplikuar metodën e veçantë:
- (a) në fitim ose humbje si një nënzë të veçantë; dhe dhe
 - (b) në të ardhurat e tjera gjithëpërfshirëse, si një përbërës të veçantë të të ardhurave të tjera gjithëpërfshirëse.

- 35E Një aktiv financiar përcaktohet si i pranueshëm për metodën e veçantë, nëse, dhe vetëm nëse, plotësohen kriteret e mëposhtme:
- (a) ai është matur me vlerën e drejtë nëpërmjet fitimit ose humbjes duke aplikuar SNRF 9, por nuk do të ishte i matur me vlerë të drejtë nëpërmjet fitimit ose humbjes në tërësinë e tij po të zbatohet SNK 39; dhe
 - (b) ai nuk është mbajtur në lidhje me një aktivitet që nuk ka të bëjë me kontratat brenda objektit të kësaj SNRF-je. Shembuj të aktiveve financiare që nuk do të jenë të pranueshme për metodën e veçantë janë ato aktive të mbajtura në lidhje me aktivitetet bankare ose aktivet financiare të mbajtura në fonde që kanë të bëjnë me kontratat e investimeve që janë jashtë objektit të kësaj SNRF-je.
- 35F Një sigures mund të përcaktojë një aktiv financiar të pranueshëm për metodën e veçantë në momentin kur ai zgjedh të zbatojë qasjen e veçantë (shih paragrafin 35C). Më pas, ai mund të përcaktojë një aktiv financiar të pranueshëm për metodën e veçantë atëherë, dhe vetëm atëherë kur:
- (a) ky aktiv njihet fillimisht si i tillë; ose
 - (b) ky aktiv sapo plotëson kriterin në paragrafin 35E (b) por nuk e ka plotësuar këtë kriter më parë.
- 35G Një sigures lejohet të përcaktojë aktivet financiare që janë të pranueshëm për qasjen e veçantë duke zbatuar paragrafin 35F, rast pas rasti për çdo instrument.
- 35H Kur është e përshtatshme, për qëllime të zbatimit të metodës së veçantë për një aktiv financiar të sapo përcaktuar si i pranueshëm për metodën e veçantë duke zbatuar paragrafin 35F (b):
- (a) vlera e drejtë në datën e përcaktimit, do të jetë vlera e tij e re kontabël sipas kostos së amortizuar; dhe
 - (b) norma e interesit efektiv duhet të përcaktohet bazuar në vlerën e drejtë në datën e përcaktimit.
- 35I Një njësi ekonomike do të vazhdojë të zbatojë metodën e veçantë të një aktivi financiar të caktuar derisa ai aktiv financiar të rregjistrohet. Megjithatë, një njësi ekonomike:
- (a) do të heqë nga përcaktimi si i pranueshëm për metodën e veçantë një aktiv financiar kur aktivi financiar nuk plotëson më kriterin në paragrafin 35E (b). Për shembull, një aktiv financiar nuk do të plotësonte më këtë kriter, kur një njësi ekonomike transferon këtë aktiv i cili mbahet për llogari të aktiviteteve të tij bankare ose kur njësi ekonomike humbet statusin e të qenit një sigures.
 - (b) në fillim të çdo periudhe vjetore mund të heqë dorë nga zbatimi i metodës së veçantë për të gjitha aktivet financiare të përcaktuara si të tilla. Një njësi ekonomike që zgjedh për të hequr dorë nga zbatimi i metodës së veçantë do të zbatojë SNK 8 për të paraqitur efektet e ndryshimit të politikave kontabël.
- 35J Kur një njësi ekonomike heq nga përcaktimi një aktiv financiar duke zbatuar paragrafin 35I (a), ajo do ta riklasifikojë çdo tepriçë që i përket këtij aktivi nga të ardhura të tjera gjithëpërfshirëse të akumuluar në fitim ose humbje si një rregullim riklasifikues (shih SNK 1).
- 35K Nëse një njësi ekonomike ndalon së përdoruri metodën e veçantë duke zgjedhur të zbatojë paragrafin 35I (b) ose për shkak se nuk është më një sigures, ajo nuk duhet të aplikojë më pas metodën e veçantë. Një sigures që ka zgjedhur të zbatojë metodën e veçantë (shih paragrafin 35C), por nuk ka aktive financiare që plotësojnë kushtet si të tilla, (shih paragrafin 35E) mund të aplikojnë metodën e veçantë më pas, kur ajo do të ketë aktive financiare të tilla.

Ndërveprimi me Standardet e tjera

- 35L Paragrafi 30 i kësaj SNRF-je lejon një praktikë që ndonjëherë quhet si 'kontabiliteti hije'. Nëse një sigures zbaton metodën e veçantë, kontabiliteti hije mund të jetë i zbatueshëm.
- 35M Riklasifikimi i një shume midis fitimit ose humbjes dhe të ardhurave të tjera gjithëpërfshirëse duke aplikuar paragrafin 35B mund të ketë efekte pasuese në tatimin mbi të ardhurat duke përfshirë edhe shumatat e tjera në të ardhura e tjera gjithëpërfshirëse. Një sigures do të zbatojë SNRF-të përkatëse, si për shembull SNK 12 *Tatimet mbi të ardhura*, për të përcaktuar ndonjë efekt të tillë pasues.

Adoptues për herë të parë

- 35N Në qoftë se një adoptues për herë të parë zgjedh të zbatojë metodën e veçantë, ai do të riparaqesë informacionin krahasues për të reflektuar metodën e veçantë nëse, dhe vetëm nëse, ai riparaqet informacionin krahasues në përputhje me SNRF 9 (shih paragrafët E1-E2 e SNRF 1).

Dhënia e informacioneve shpjeguese

Shpjegimi i shumave të njohura

36 Një sigurues duhet të japë informacion shpjegues, që identifikon dhe shpjegon shumat në pasqyrat financiare të tij, të cilat rrjedhin nga kontratat e sigurimit.

37 Për të qenë në pajtim me paragrafin 36, një sigurues duhet të japë informacion shpjegues për:

- (a) politikat e tij kontabël për kontratat e sigurimit dhe aktivet, detyrimet, të ardhurat dhe shpenzimet përkatëse.
- (b) aktivet, detyrimet, të ardhurat dhe shpenzimet e njohura (dhe flukset e mjeteve monetare, nëse ai paraqet pasqyrën e flukseve të mjeteve monetare me metodën direkte) që vijnë nga kontratat e sigurimit. Për më tepër nëse siguruesi është një cedues, ai duhet të japë informacione shpjeguese për:
 - (i) fitimet dhe humbjet neto të njohura në fitim ose humbje nga blerja e ri sigurimeve; dhe
 - (ii) nëse ceduesi shtyn dhe amortizon fitimet dhe humbjet që vijnë nga blerja e ri sigurimeve, amortizimin për periudhën dhe shumat e mbetura të pa amortizuara në fillim dhe në fund të periudhës.
- (c) procesin e përdorur për të përcaktuar supozimet që kanë efektin më të madh në matjen e shumave të njohura të përshkruara në (b). Kur është e mundur, një sigurues duhet të japë informacione shpjeguese sasiore rreth këtyre supozimeve.
- (d) efektin e ndryshimeve në supozimet e përdorura për të matur aktivet e sigurimit dhe detyrimet e sigurimit, duke treguar veçmas efektin e çdo ndryshimi që ka efekt material në pasqyrat financiare.
- (e) rakordimet e ndryshimeve në detyrimet e sigurimit, aktivet e ri sigurimit dhe nëse ka, në kostot e shtyra të lidhura me blerjen.

Natyra dhe madhësia e rreziqeve që vijnë nga kontratat e sigurimit

38 Një sigurues duhet të japë informacion shpjegues që i mundëson përdoruesit e pasqyrave të tij financiare të vlerësojnë natyrën dhe madhësinë e rreziqeve që vijnë nga kontratat e sigurimit.

39 Për të qenë në pajtim me paragrafin 38, një sigurues duhet të japë informacion shpjegues për:

- (a) objektivat, politikat dhe proceset e tij për menaxhimin e rreziqeve që vijnë nga kontratat e sigurimit dhe metodat e përdorura për të menaxhuar këto rreziqe.
- (b) [fshirë]
- (c) informacion rreth *rrezikut të sigurimit* (para dhe pas zbutjes së rrezikut nëpërmjet ri sigurimit) duke përfshirë informacion për:
 - (i) ndjeshmërinë ndaj rrezikut të sigurimit (shih paragrafin 39A).
 - (ii) përqendrimet e rrezikut të sigurimit, duke përfshirë një përshkrim të mënyrës se si drejtimi përcakton përqendrimet dhe një përshkrim të karakteristikave të përbashkëta që identifikojnë çdo përqendrim (p.sh. lloji i ngjarjes së siguar, zona gjeografike ose monedha).
 - (iii) kërkesat aktuale të krahasuara me vlerësimet e mëparshme (d.m.th. zhvillimin e kërkesave). Dhënia e informacioneve shpjeguese rreth zhvillimit të kërkesave duhet të kthehet në periudhën kur doli kërkesa materiale më e hershme, për të cilat ka ende pasiguri rreth shumës dhe kohës së pagesave për kërkesat, por nuk ka nevojë që të shkohet më shumë se 10 vjet pas. Një sigurues nuk ka nevojë të japë këtë informacion shpjegues për kërkesa për të cilat pasiguria rreth shumës dhe kohës së pagesave për kërkesat, zakonisht zgjidhet brenda një viti.
- (d) informacion rreth rrezikut të kredisë, rrezikut të likuiditetit dhe rrezikut të tregut, që do të kërkohej sipas paragrafëve 31-42 të SNRF 7, nëse kontratat e sigurimit do të ishin brenda objektivit të SNRF 7. Megjithatë:
 - (i) një sigurues nuk ka nevojë të sigurojë analizën e maturimit të kërkuar nga paragrafi 39(a) i SNRF 7, nëse në vend të saj ai jep informacion shpjegues rreth kohës së

vlerësuar të flukseve dalëse të mjeteve monetare neto që vijnë nga njohja e detyrimeve të sigurimit. Kjo mund të marrë formën e një analize, me afate të vlerësuar, të shumave të njohura në pasqyrën e pozicionit financiar.

- (ii) nëse një sigures përdor një metodë alternative për të menaxhuar ndjeshmërinë në kushtet e tregut, si p.sh., një analizë e vlerës së përfshirë, ai mund të përdorë analizën e ndjeshmërisë për të plotësuar kërkesën në paragrafin 40(a) të SNRF 7. Gjithashtu, një sigures i tillë duhet të sigurojë dhënien e informacioneve shpjeguese të kërkuar nga paragrafi 41 i SNRF 7.
 - (e) informacion rreth ekspozimeve ndaj rrezikut të tregut që vjen nga derivativët e përfshirë që përmban një kontratë sigurimi bazë, nëse siguresit nuk i kërkohet dhe ai nuk mat derivativët e përfshirë me vlerën e drejtë.
- 39A Për t'u pajtuar me paragrafin 39(c)(i), një sigures duhet të japë informacion shpjegues ose për (a) ose për (b) si vijon:
- (a) një analizë ndjeshmërie e cila tregon sesi fitimi ose humbja dhe kapitali do të ndikoheshin nëse ndodhnin ndryshimet në variablat e rëndësishëm të rrezikut, të cilët ishin të mundshëm në mënyrë të arsyeshme në fund të periudhës raportuese; metodat dhe supozimet e përdorura në përgatitjen e analizës së ndjeshmërisë; dhe çdo ndryshim nga periudha e mëparshme në metodat dhe supozimet e përdorura. Megjithatë, nëse një sigures përdor një metodë alternative për të menaxhuar ndjeshmërinë në kushtet e tregut, si p.sh., një analizë e vlerës së përfshirë, ai mund të plotësojë këtë kërkesë duke dhënë informacione shpjeguese për këtë analizë alternative të ndjeshmërisë dhe duke dhënë informacionet shpjeguese të kërkuar nga paragrafi 41 i SNRF 7.
 - (b) informacionin sasior rreth ndjeshmërisë dhe informacionin rreth atyre termave dhe kushteve të kontratave të sigurimit, që kanë një efekt material në shumën, afatin dhe pasigurinë e flukseve të ardhshme të mjeteve monetare të siguresit

Dhënia e informacioneve shpjeguese në lidhje me përjashtimin e përkohshëm nga SNRF 9

- 39B Një sigures që zgjedh të zbatojë përjashtimin e përkohshëm nga SNRF 9 do të japë informacion shpjegues për t'ju mundësuar përdoruesve të pasqyrave financiare:
- (a) të kuptojnë se si siguresi është kualifikuar për përjashtimin e përkohshëm; dhe
 - (b) të krahasojnë siguresit që aplikojnë përjashtimin e përkohshëm me njësitë ekonomike që aplikojnë SNRF 9.
- 39C Për të qenë përputhje me paragrafin 39B(a), një sigures duhet të japë informacion shpjegues për faktin se ai aplikon përjashtimin e përkohshëm nga SNRF 9 dhe se si siguresi ka zgjedhur datën e specifikuar në paragrafin 20B(b) që e kualifikon atë për përjashtimin e përkohshëm nga SNRF 9, duke përfshirë:
- (a) nëse vlera kontabël e detyrimeve që rrjedhin nga kontratat brenda objektit të kësaj SNRF-je (d.m.th ato detyrime të përshkruara në paragrafin 20E (a)) ishte më pak ose e barabartë me 90 për qind të shumës totale kontabël të të gjitha detyrimeve të tij, natyrën dhe vlerën kontabël të detyrimeve të lidhura me sigurimin të cilat nuk janë detyrime që rrjedhin nga kontratat brenda objektit të kësaj SNRF-je (d.m.th ato detyrime të përshkruara në paragrafët 20E (b) dhe 20E (c));
 - (b) nëse përqindja e shumës totale kontabël të detyrimeve të tij lidhur me sigurimin në krahasim me vlerën kontabël neto gjithsej të të gjitha detyrimeve të tij ishte më pak se ose e barabartë me 90 për qind, por më e madhe se 80 për qind, mënyrën si siguresi ka përcaktuar se ai nuk është i angazhuar në një aktivitet të rëndësishëm pa lidhje me sigurimin, duke përfshirë edhe se çfarë informacioni është marrë në konsideratë; dhe
 - (c) nëse siguresi kualifikohet për përjashtimin e përkohshëm nga SNRF 9 në bazë të rivlerësimit duke zbatuar paragrafin 20G (b):
 - (i) arsyen e ri klasifikimit.
 - (ii) datën në të cilën ka ndodhur ndryshimi i rëndësishëm në aktivitetet e tij; dhe
 - (iii) një shpjegim të detajuar të ndryshimit të aktiviteteve të saj dhe një përshkrim cilësor të efektit të këtij ndryshimi në pasqyrat financiare të njësisë ekonomike.
- 39D Në zbatim të paragrafit 20G (a), nëse një njësi ekonomike arrin në përfundimin se aktivitetet e saj nuk janë më të lidhura kryesisht me sigurimin, ajo duhet të japë informacionin e mëposhtëm në çdo periudhë raportuese para se të fillojë të zbatojë SNRF 9:

- (a) faktin se ajo nuk kualifikohet për përjashtimin e përkohshëm nga SNRF 9;
 - (b) datën në të cilën ka ndodhur ndryshimi i rëndësishëm në aktivitetet e tij; dhe
 - (c) një shpjegim të detajuar të ndryshimit të aktivitetëve të saj dhe një përshkrim cilësor të efektit të këtij ndryshimi në pasqyrat financiare të njësisë ekonomike.
- 39E Në përputhje me paragrafin 39B(b), një sigurues duhet të japë informacion shpjegues për vlerën e drejtë në fund të periudhës raportuese dhe shumën e ndryshimit në vlerën e drejtë gjatë kësaj periudhe për të dy grupet e mëposhtme të aktiveve financiare veçmas:
- (a) aktivet financiare me kushte kontraktuale që në datat e specifikuara ndikojnë në flukset e mjeteve monetare vetëm me anë të pagesave të principalit dhe të interesit mbi shumën e principalit të papaguar (p.sh. aktivet financiare që plotësojnë kushtin në paragrafin 4.1.2 (b) dhe 4.1.2A (b) të SNRF 9), duke përjashtuar çdo aktiv financiar që plotëson përkufizimin si të mbajtura për tregtim në SNRF 9, ose që është menaxhuar dhe performanca e të cilit është vlerësuar në bazë të vlerës së drejtë (shih paragrafin B4.1.6 të SNRF 9).
 - (b) të gjitha aktivet financiare përveç atyre të specifikuara në paragrafin 39E (a); që është, çdo aktiv financiar:
 - (i) me kushte kontraktuale që nuk sjellin flukse monetare në data të përcaktuara që kanë të bëjnë vetëm pagesa të principalit dhe të interesit mbi shumën e principalit të papaguar;
 - (ii) që plotëson përkufizimin si të mbajtura për tregtim në SNRF 9; ose
 - (iii) që menaxhohet dhe performanca e të cilit është vlerësuar në bazë të vlerës së drejtë.
- 39F Kur siguruesi jep informacione shpjeguese për informacionin në paragrafin 39E, ai:
- (a) mund të gjykojë se matja e vlerës kontabël të aktivitetit financiar sipas SNK 39 të jetë një përafrim i arsyeshëm i vlerës së tij të drejtë, nëse siguruesi nuk është i detyruar të japë informacion shpjegues për vlerën e drejtë sipas paragrafit 29 (a) të SNRF 7 (p.sh. llogari të arkëtueshme tregtare afat shkurtër); dhe
 - (b) do të marrë parasysh nivelin e detajeve të nevojshme për t'ju mundësuar përdoruesve të pasqyrave financiare të kuptojnë karakteristikat e aktiveve financiare.
- 39G Për të qenë në përputhje me paragrafin 39B(b), një sigurues do të japë informacione shpjeguese në lidhje me ekspozimin e rrezikut të konsiderueshëm të kredisë, duke përfshirë edhe përqendrimet të rëndësishme të rrezikut të kredisë, si një rrezik i natyrshëm për aktivet financiare të përshkruara në paragrafin 39E (a). Minimalisht, për këto aktive financiare në fund të periudhës raportuese: një sigurues do të japë informacionin shpjegues të mëposhtëm
- (a) klasat sipas vlerësimit të rrezikut të kredisë siç përcaktohet në SNRF 7, vlerat kontabël duke zbatuar SNK 39 (në rastin e aktiveve financiare të matura me koston e amortizuar, para rregullimit për provizionet e zhvlerësimit).
 - (b) për aktivet financiare të përshkruara në paragrafin 39E (a) që nuk kanë rrezik të ulët të kredisë në fund të periudhës raportuese, vlerën e drejtë dhe vlerën kontabël duke zbatuar SNK 39 (në rastin e aktiveve financiare të matura me koston e amortizuar, para rregullimit për provizionet e zhvlerësimit). Për qëllimet e dhënies së informacioneve shpjeguese për këtë rast, paragrafi B5.5.22 i SNRF 9 parashikon kërkesat përkatëse për vlerësimin nëse rreziku i kredisë për një instrument financiar është konsideruar i ulët.
- 39H Për të qenë në përputhje me paragrafin 39B(b), një sigurues do të japë informacion shpjegues për përdoruesit e pasqyrave financiare se ku ata mund të marrin ndonjë informacion të hapur për publikun rreth SNRF 9 që lidhet me një njësi ekonomike brenda grupit dhe që nuk është paraqitur në pasqyrat financiare të konsoliduara të grupit për periudhën përkatëse raportuese. Për shembull, të tilla informacione për SNRF 9 mund të merren nga pasqyrat financiare individuale ose të veçanta të disponueshme të publikisht të një njësie ekonomike brenda grupit që ka aplikuar SNRF 9.
- 39I Nëse një njësi ekonomike që ka zgjedhur të zbatojë përjashtimin në paragrafin 200 për kërkesat e veçanta të SNK 28, ajo duhet të japë informacionet shpjeguese për këtë fakt.
- 39J Nëse një njësi ekonomike ka zbatuar përjashtim e përkohshëm nga SNRF 9 për investimin e saj në një pjesëmarrje ose sipërmarrje të përbashkët duke përdorur metodën e kapitalit neto (për shembull, shih paragrafin 200 (a)), përveç informacionit të kërkuar nga SNRF 12 *Dhënia e informacionit shpjegues mbi interesat në njësitë e tjera ekonomike*, njësia ekonomike duhet të japë informacion shpjegues si më poshtë :
- (a) informacionin e përshkruar në paragrafët 39B-39H për çdo pjesëmarrje ose sipërmarrje të përbashkët që është materiale për njësinë ekonomike. Shumat që do jepen këtu duhet të jenë ato të përfshira në pasqyrat financiare sipas SNRF-ve të pjesëmarrjes ose sipërmarrjes së përbashkët

pasi të jenë reflektuar ndryshimet e bëra nga njësia ekonomike kur përdoret metoda e kapitalit neto (shih paragrafin B14(a) të SNRF 12), dhe jo shumat proporcionale që i përkasin njësisë ekonomike.

- (b) informacionin sasior të përshkruar nga paragrafët 39B-39H në total për të gjithë pjesëmarrjet ose sipërmarrje e përbashkëta që janë jo materiale individualisht. Shumat totale:
 - (i) të shpjeguara do të jenë pjesa e këtyre shumave që i përkasin njësisë ekonomike; dhe
 - (ii) për pjesëmarrjet shumat do të shpjegohen(paraqiten) veçmas nga shumat totale të shpjeguara(paraqitura) për sipërmarrjet e përbashkëta.

Dhënia e informacioneve shpjeguese në lidhje me metodën e veçantë të paraqitjes

39K Një siguries që zbaton metodën e veçantë do të japë informacion shpjegues për t'ju mundësuar përdoruesve të pasqyrave financiare të kuptojnë:

- (a) se si llogaritet shuma totale e riklasifikuar midis fitimit ose humbjes dhe të ardhurave të tjera gjithëpërfshirëse në periudhën raportuese; dhe
- (b) efektin e këtij riklasifikimi në pasqyrat financiare.

39L Për të qenë në pajtim me paragrafin 39K, një siguries do të japë informacion shpjegues për:

- (a) faktin se ai ka aplikuar metodën e veçantë;
- (b) vlerën kontabël në fund të periudhës së raportimit të aktiveve financiare për të cilat siguriesi aplikon metodën e veçantë sipas klasës së aktivitet financiar;
- (c) bazat për përcaktimin e aktiveve financiare për metodën e veçantë, duke përfshirë një shpjegim për secilën nga ato aktive financiare të përcaktuara që janë mbajtur jashtë njësisë ekonomike ligjore që lëshon kontrata brenda objektit të kësaj SNRF-je;
- (d) një shpjegim të shumës totale që riklasifikohet midis fitimit ose humbjes dhe të ardhurave të tjera gjithëpërfshirëse në periudhën raportuese, në një mënyrë që mundëson përdoruesit e pasqyrave financiare të kuptojnë se si është përcaktuar shuma, duke përfshirë:
 - (i) shumës së raportuar në fitim ose humbje për aktivet financiare të përcaktuara të tilla nga aplikimi i SNRF 9; dhe
 - (ii) shumës që do të ishte raportuar në fitim ose humbje për aktivet financiare të përcaktuara të tilla, në qoftë se siguriesi do të kishte aplikuar SNK 39.
- (e) efektin e riklasifikimit të përshkruar në paragrafët 35B dhe 35M në secilin zë të prekur në fitim ose humbje; dhe
- (f) nëse gjatë periudhës raportuese siguriesi ka ndryshuar përcaktimin e aktiveve financiare:
 - (i) shumën e riklasifikuar midis fitimit ose humbjes dhe të ardhurave të tjera gjithëpërfshirëse në periudhën raportuese në lidhje me aktivet financiare të reja të përcaktuara sipas zbatimit të metodës së veçantë (shih paragrafin 35F (b));
 - (ii) shumën që do të ishte riklasifikuar midis fitimit ose humbjes dhe të ardhurave të tjera gjithëpërfshirëse përmbledhëse në periudhën e raportimit, nëse aktivet financiare nuk do ishin të hequr nga përcaktimi (shih paragrafin 35I (a)); dhe
 - (iii) shumën e riklasifikuar në periudhën raportuese në fitim ose humbje nga të ardhurat e tjera gjithëpërfshirëse të akumuluar për aktivet financiare që janë hequr nga përcaktimi (shih paragrafin 35J).

39M Nëse një njësi ekonomike ka zbatuar metodën e veçantë për investimin e saj në një pjesëmarrje ose sipërmarrje të përbashkët duke përdorur metodën e kapitalit neto, njësia ekonomike,përveç informacionit të kërkuar nga SNRF 12 duhet të japë informacion shpjegues si më poshtë, :

- (a) informacionin e përshkruar në paragrafët 39K-39L për çdo pjesëmarrje ose sipërmarrje të përbashkët që është materiale për njësinë ekonomike. Shumat që do jepen këtu duhet të jenë ato të përfshira në pasqyrat financiare sipas SNRF-ve të pjesëmarrjes ose sipërmarrjes së përbashkët pasi të jenë reflektuar ndryshimet e bëra nga njësia ekonomike kur përdoret metoda e kapitalit neto (shih paragrafin B14(a) të SNRF 12), dhe jo shumat proporcionale që i përkasin njësisë ekonomike.

- (b) informacionin sasior të përshkruar nga paragrafët 39K-39L(d) dhe 39L(f), dhe efektin e riklasifikimit të përshkruar në paragrafin 35B në fitim ose humbje dhe të ardhura të tjera gjithëpërfshirëse në total për të gjithë pjesëmarrjet ose sipërmarrje të përbashkëta që janë individualisht jo materiale. Shumat totale:
- (i) të shpjeguara do të jenë pjesa e këtyre shumave që i përkasin njësisë ekonomike; dhe
 - (ii) për pjesëmarrjet shumat do të shpjegohen(paraqiten) veçmas nga shumat totale të shpjeguara(paraqitura) për sipërmarrjet e përbashkëta.

Data e hyrjes në fuqi dhe dispozita kalimtare

- 40 Dispozitat kalimtare në paragrafët 41-45 zbatohen si për një njësi ekonomike që tashmë zbaton SNRF-të, kur ajo zbaton për herë të parë këtë SNRF, ashtu dhe për një njësi ekonomike që zbaton SNRF-të për herë të parë (një adoptues për herë të parë).
- 41 Një njësi ekonomike duhet të zbatojë këtë SNRF për periudhat vjetore që fillojnë më datën 1 janar 2005 e në vijim. Inkurajohet zbatimi i menjëhershëm. Nëse një njësi ekonomike e zbaton këtë SNRF për një periudhë më të hershme, ajo duhet të japë informacione shpjeguese për këtë fakt.
- 41A *Kontratat e garancisë financiare* (Ndryshimet në SNK 39 dhe SNRF 4) të publikuara në Gusht 2005, paragrafët e ndryshuar 4(d), B18 (g) dhe B19 (f). Një njësi ekonomike duhet të zbatojë këto ndryshime për periudhat vjetore që fillojnë më datën 1 janar 2006 e në vijim. Inkurajohet zbatimi i menjëhershëm. Nëse një njësi ekonomike zbaton këto ndryshime për një periudhë më të hershme, ajo duhet të japë informacion shpjegues për këtë fakt dhe njëkohësisht të zbatojë ndryshimet që i takojnë SNK 39 dhe SNK 32⁴.
- 41B SNK 1 (i rishikuar në 2007) ndryshoi terminologjinë e përdorur në të gjithë SNRF-të. Në përputhje me këtë u ndryshua paragrafi 30. Një njësi ekonomike duhet të zbatojë këto ndryshime për periudhat vjetore nga 1 janar 2009 e në vazhdim. Nëse një njësi ekonomike zbaton SNK 1 (i rishikuar në 2007) për një periudhë më të hershme, ndryshimet do të zbatohen për këtë periudhë më të hershme.
- 41C [Fshirë]
- 41D [Fshirë]
- 41E SNRF 13 *Matja me vlerën e drejtë*, publikuar në maj 2011, ndryshoi përkufizimin e vlerës së drejtë në Shtojcën A. Një njësi ekonomike do të zbatojë këtë ndryshim kur ajo zbaton SNRF 13.
- 41F [Fshirë]
- 41G SNRF 15 *Të ardhurat nga Kontratat me Klientët*, i publikuar në Maj 2014, ndryshoi paragrafët 4(a) dhe (c), B7, B18(h), B21. Njësia ekonomike duhet t'i zbatojë këto ndryshime, kur zbaton SNRF 15.
- 41H SNRF 9, i botuar në Korrik 2014, ka ndryshuar paragrafët 3, 4, 7, 8, 12, 34, 35, 45, Shtojcën A dhe paragrafët B18-B20 si dhe janë fshirë paragrafët 41C, 41D dhe 41F. Njësia ekonomike duhet t'i zbatojë këto ndryshime, kur zbaton SNRF 9.
- 41I SNRF 16, i publikuar në Janar 2016, ndryshoi paragrafin 4. Një njësi ekonomike do të zbatojë këtë ndryshim kur ajo zbaton SNRF 16.

Dhënia e informacioneve shpjeguese

- 42 Një njësi ekonomike nuk ka nevojë të zbatojë kërkesat për dhënie informacionesh shpjeguese të këtij SNRF për informacionin krahasues që lidhet me periudhat vjetore që fillojnë para datës 1 janar 2005, me përjashtim të dhënies së informacioneve shpjeguese të kërkuara nga paragrafi 37(a) dhe (b) rreth politikave kontabël dhe njohjes së aktiveve, detyrimeve, të ardhurave dhe shpenzimeve (dhe flukset e mjeteve monetare nëse përdoret metoda direkte).
- 43 Nëse nuk është praktike zbatimi i një kërkesë të caktuar të paragrafëve 10-35 për informacionin krahasues, i cili lidhet me periudhat vjetore që fillojnë përpara datës 1 janar 2005, një njësi ekonomike duhet të japë informacion shpjegues për këtë fakt. Zbatimi i testit të mjaftueshmërisë së detyrimeve (paragrafët 15-19) për këtë informacion krahasues ndonjëherë mund të jetë i pazbatueshëm, por ka shumë pak të ngjarë që për këtë informacion krahasues, të jetë jopraktik zbatimi i kërkesave të tjera të paragrafëve 10-35. SNK 8 jep shpjegimin e termit 'i pazbatueshëm'.

4

Kur një njësi ekonomike zbaton SNRF 7, referenca tek SNK 32 zëvendësohet nga një referencë tek SNRF 7.

- 44 Në zbatimin e paragrafit 39(c)(iii), një njësi ekonomike nuk ka nevojë të japë informacion shpjegues rreth zhvillimit të kërkesave që kanë ndodhur më herët se pesë vjet nga fundi i vitit të parë financiar në të cilin ajo zbaton këtë SNRF. Për më tepër, nëse nuk është praktike, kur një njësi ekonomike zbaton për herë të parë këtë SNRF, për të përgatitur informacion rreth zhvillimit të kërkesave që kanë ndodhur më parë se fillimi i periudhës më të hershme për të cilën një njësi ekonomike paraqet informacion krahasues të plotë i cili përputhet me këtë SNRF, njësi ekonomike duhet të japë informacion shpjegues për këtë fakt..

Riklasifikimi i aktiveve financiare

- 45 Pavarësisht nga paragrafi 4.4.1 e SNRF 9, nëse një sigures ndryshon politikat e tij kontabël për detyrimet e sigurimit, atij i lejohej, por nuk i kërkohet, të riklasifikojë disa ose të gjithë aktivet financiare të tij të matur me vlerën e drejtë përmes fitimit ose humbjes. Ky riklasifikim lejohet nëse një sigures ndryshon politikat kontabël kur ai zbaton për herë të parë këtë SNRF dhe nëse ai bën një ndryshim të mëpasshëm të politikës të lejuar nga paragrafi 22. Riklasifikimi është një ndryshim në politikën kontabël dhe për këtë zbatohet SNK 8.

Zbatimi i SNRF 4 dhe SNRF 9

Përfshirje të përkohshme nga SNRF 9

- 46 *Zbatimi SNRF 9 Instrumentet Financiarë me SNRF 4 Kontratat e sigurimit (Ndryshimet në SNRF 4), publikuar në shtator të vitit 2016, ka ndryshuar paragrafët 3 dhe 5, dhe ka shtuar paragrafët 20A-20Q, 35A dhe 39B-39J dhe titujt pas paragrafëve 20, 20K, 20N dhe 39A. Një njësi ekonomike do të zbatojë këto ndryshime, të cilat lejojnë siguresit që plotësojnë kriteret specifike për të aplikuar një përfshirje të përkohshme nga SNRF 9, për periudhat vjetore që fillojnë më 1 janarit 2018 dhe më pas.*
- 47 Një njësi ekonomike që jep informacion shpjegues për informacionin e kërkuar nga paragrafët 39B-39J do të përdorë dispozitat kalimtare të SNRF 9 të cilat janë të përshtatshme për të bërë vlerësimet e nevojshme për këto informacione shpjeguese. Data e fillimit të zbatimit për këtë qëllim do të jetë fillimi i periudhës së parë vjetore që nis më 1 janar 2018 ose më pas.

Metoda e paraqitjes e veçantë

- 48 *Zbatimi SNRF 9 Instrumentet Financiarë me SNRF 4 Kontratat e sigurimit (Ndryshimet në SNRF 4), publikuar në shtator të vitit 2016, ka ndryshuar paragrafët 3 dhe 5, dhe ka shtuar paragrafët 35A-35N, dhe 39K-39M dhe titujt pas paragrafëve 35A, 35K, 35M dhe 39J. Një njësi ekonomike do të zbatojë këto ndryshime, të cilat lejojnë siguresit për të aplikuar metodën e veçantë për aktivet financiare të përcaktuara, kur ai zbaton për herë të parë SNRF 9 (shih paragrafin 35c).*
- 49 Një njësi ekonomike që zgjedh të zbatojë metodën e veçantë do të:
- (a) zbatojë këtë metodë në retrospektivë për aktivet financiare të përcaktuara përgjatë kalimit në SNRF 9. Në përputhje me rrethanat, për shembull, njësi ekonomike do të njohë si një rregullim në tepicën e çeljes së të ardhurave të tjera gjithëpërfshirëse të akumuluar një shumë të barabartë me diferencën midis vlerës së drejtë të aktiveve financiare të përcaktuara sipas zbatimit të SNRF 9 dhe vlerës kontabël të tyre të përcaktuar sipas zbatimit të SNK 39.
 - (b) riparaqesë informacion krahasues për të reflektuar metodën e veçantë nëse, dhe vetëm nëse, njësi ekonomike riparaqet informacion krahasues duke zbatuar SNRF 9.

Shtojca A

Termet e përkufizuara

Kjo shtojcë është pjesë përbërëse e këtij SNRF.

cedues	Mbajtësi i policës së sigurimit sipas një kontrate ri sigurimi .
përbërësi i depozitës	Një përbërës kontraktual i cili nuk trajtohet si një derivativ sipas SNRF 9 dhe nëse do të ishte një instrument i veçantë, do të ishte brenda objektit të SNRF 9.
kontratë direkte sigurimi	Një kontratë sigurimi që nuk është një kontratë ri sigurimi kontratë
tipar i pjesëmarrjes së lirë	<p>Një e drejtë kontraktuale për të marrë përfitime shtesë si një shtojcë e përfitimeve të garantuara:</p> <ul style="list-style-type: none"> (a) që pritet të jenë një pjesë e rëndësishme e përfitimeve kontraktuale gjithsej; (b) shuma ose koha e të cilave, sipas kontratës varet nga nxjerrësi; dhe (c) të cilat sipas kontratës bazohen në: <ul style="list-style-type: none"> (i) performancën e një grupi të caktuar kontratash ose e një tipi të caktuar kontratash; (ii) kthimet e realizuara dhe/ose të parealizuara të investimeve në një grup të caktuar aktivesh të mbajtura nga nxjerrësi; ose (iii) fitimin ose humbjen e shoqërisë, fondit ose një njësie ekonomike tjetër që lëshon kontratën.
vlera e drejtë	<i>Vlera e drejtë</i> është çmimi që do të pranohej për të shitur një aktiv ose paguhej për të transferuar një detyrim në një transaksion të rregullt midis pjesëmarrësve të tregut në datën e matjes. (Shih SNRF 13.)
kontratë e garancisë financiare	Një kontratë sipas së cilës i kërkohet emetuesit të bëjë pagesa të caktuara për të rimbursuar mbajtësin për një humbje që pëson për shkak se një debitor i caktuar nuk bën pagesat kur ato kërkohen në përputhje me termat fillestare ose të modifikuara të një instrumenti borxhi.
rreziku financiar	Rreziku i një ndryshimi të mundshëm të ardhshëm në një ose më shumë norma interesi të caktuara, çmimin e instrumentit financiar, çmimin e mallit, kursin e këmbimit, indeksit të çmimeve, klasifikim kredie ose indeks kredie ose variabla të tjerë, po qe se në rastin e një variabli jo-financiar ky variabël nuk është specifik për një palë të kontratës.
përfitimet e garantuara	Pagesat ose përfitimet e tjera për të cilat një mbajtës i policës së sigurimit ose një investitor i caktuar ka një të drejtë të pakundërshtueshme e cila nuk është subjekt i zgjedhjes sipas kontratës së lëshuesit.
elementi i garantuar	Një detyrim për të paguar përfitimet e garantuara të përfshira në një kontratë që përmban një tipar pjesëmarrjeje të lirë .
aktiv i sigurimit	E drejta kontraktuale neto e një siguruesi sipas një kontrate sigurimi .
kontratë sigurimi	Një kontratë sipas të cilës një palë (siguruesi) pranon rrezik sigurimi të rëndësishëm nga një palë tjetër (mbajtësi i policës së sigurimit) duke rënë dakord që të kompensojë mbajtësin e policës së sigurimit nëse një ngjarje e caktuar e pasigurt e ardhshme (ngjarja e siguruar) ndikon negativisht mbajtësin e policës së sigurimit. (Shih Shtojcën B si udhëzues për këtë përkufizim.)
detyrimi i sigurimit	Detyrimi kontraktual neto i një siguruesi sipas një kontrate sigurimi .
rreziku i sigurimit	Rrezik i ndryshëm nga rreziku financiar , i transferuar nga mbajtësi i një kontrate tek lëshuesi.

ngjarja e siguruar	Një ngjarje e pasigurt e ardhshme që mbulohet nga një kontratë sigurimi dhe që krijon rrezik sigurimi .
siguruesi	Pala që ka një detyrim sipas një kontrate sigurimi për të kompensuar një mbajtës të policës së sigurimit nëse ndodh një ngjarje e siguruar .
testi i mjaftueshmërisë së detyrimeve	Një vlerësim nëse vlera kontabël e një detyrimi të sigurimit duhet të rritet (ose vlera kontabël e kostove përkatëse të shtyra të blerjes ose aktiveve përkatëse jo-materiale bie), bazuar në një shqyrtim të flukseve të ardhshme të mjeteve monetare.
mbajtësi i policës së sigurimit	Një palë që ka një të drejtë për t'u kompensuar sipas një kontrate sigurimi nëse ndodh një ngjarje e siguruar .
aktivet e ri sigurimit	E drejta kontraktuale neto e një ceduesi sipas një kontrate ri sigurimi .
kontratë ri sigurimi	Një kontratë sigurimi e lëshuar nga një sigurues (ri siguruesi) për të kompensuar një tjetër sigurues (ceduesi) për humbjet në një ose më shumë kontrata të nxjerra nga ceduesi.
ri siguruesi	Pala që ka një detyrim sipas një kontrate ri sigurimi për të kompensuar një cedues nëse ndodh një ngjarje e siguruar .
veçimi	Trajtimi i përbërësve të një kontrate sikur të ishin kontrata të veçanta.

Shtojcë B

Përkufizimi i një kontrate sigurimi

Kjo shtojcë është pjesë përbërëse e kësaj SNRF.

- B1 Kjo shtojcë jep udhëzime për përkufizimin e një kontrate sigurimi të dhënë në Shtojcën A. Ajo trajton çështjet në vijim:
- (a) termin 'ngjarje e pasigurt e ardhshme' (paragrafët B2-B4);
 - (b) pagesat në natyrë (paragrafët B5-B7);
 - (c) rrezikun e sigurimit dhe rreziqet e tjera (paragrafët B8-B17);
 - (d) shembuj të kontratave të sigurimit (paragrafët B18-B21);
 - (e) rrezikun e rëndësishëm të sigurimit (paragrafët B22-B28); dhe
 - (f) ndryshimet në nivelin e rrezikut të sigurimit (paragrafët B29 dhe B30).

Ngjarje e ardhshme e pasigurt

- B2 Pasiguria (ose rreziku) është thelbi i një kontrate sigurimi. Prandaj të paktën një nga çështjet e mëposhtme është e pasigurt në kohën e krijimit të një kontrate sigurimi:
- (a) fakti nëse një *ngjarje e siguar* do të ndodhë;
 - (b) fakti nëse ajo do të ndodhë; ose
 - (c) sa duhet të paguajë siguresi nëse ajo ndodh.
- B3 Në disa kontrata sigurimi, ngjarja e siguar është zbulimi i një humbjeje gjatë kohës së kontratës, edhe nëse humbja vjen nga një ngjarje që ka ndodhur para fillimit të kontratës. Në kontrata sigurimi të tjera, ngjarja e siguar është një ngjarje që ndodh gjatë kohës së kontratës, edhe nëse humbja që vjen zbulohet pas fundit të afatit të kontratës.
- B4 Disa kontrata sigurimi mbulojnë ngjarje që kanë ndodhur tashmë, por efekti financiar i të cilave është ende i pasigurt. Një shembull është një kontratë ri sigurimi e cila mbulon siguresin direkt ndaj zhvillimeve negative të kërkesave tashmë të raportuara nga mbajtësit e policave të sigurimit. Në kontrata të tilla, ngjarja e siguar është zbulimi i kostos së fundit të këtyre kërkesave.

Pagesat në natyrë

- B5 Disa kontrata sigurimi kërkojnë ose lejojnë që pagesat të bëhen në natyrë. Një shembull është kur siguresi zëvendëson drejtpërdrejt një artikull të vjedhur, në vend të rimbursimit të mbajtësit të policës së sigurimit. Një shembull tjetër është kur një siguresi përdor spitalet dhe stafin mjekësor të tij për të dhënë shërbimet mjekësore të mbuluara nga kontratat.
- B6 Disa kontrata shërbimi me komision fiks, në të cilat niveli i shërbimit varet nga një ngjarje e pasigurt përmbushin përkufizimin e një kontrate sigurimi të dhënë në këtë SNRF, por në disa vende nuk janë rregulluar si kontrata sigurimi. Një shembull është një kontratë mirëmbajtjeje në të cilën ofruesi i shërbimit pranon të riparojë pajisjen pas një mosfunksionimi. Komisioni fiks i shërbimit bazohet në numrin e pritshëm të mosfunksionimeve, por fakti nëse një makinë e caktuar do të prishet është i pasigurt. Mosfunksionimi i pajisjes ndikon negativisht zotëruesin e saj dhe kontrata kompenson zotëruesin (në natyrë dhe jo në mjete monetare). Një tjetër shembull është një kontratë për shërbimet e riparimit të një makine në të cilën ofruesi i shërbimit pranon, kundrejt një komisioni fiks vjetor, të ofrojë ndihmën në rrugë ose të tërheqë makinën në një garazh pranë. Kontrata e fundit mund të plotësojë përkufizimin e një kontrate sigurimi edhe nëse ofruesi nuk pranon të kryejë riparime ose të zëvendësojë pjesë.
- B7 Zbatimi i SNRF për kontratat e përshkruara në paragrafin B6 ka mundësi të mos jetë më i rëndësishëm sesa zbatimi i SNRF-ve që do të ishin të zbatueshme nëse kontrata të tilla do të ishin jashtë objektit të këtij SNRF:
- (a) Ka pak mundësi që të ketë detyrime materiale për keq funksionime dhe prishje, të cilat tashmë kanë ndodhur.

- (b) Nëse zbatohet SNK 18 Të ardhurat SNRF 15, ofruesi i shërbimit do të njohë të ardhurat duke ju referuar fazës së përfundimit kur (ose pasi) të transferojë shërbimet tek klienti (dhe subjekt i kriterëve të tjera të specifikuar). Kjo metodë është e pranueshme edhe sipas këtij SNRF, i cili lejon që ofruesi i shërbimit (i) të vazhdojë politikat e tij ekzistuese kontabël për këto kontrata, me përjashtim të rastit kur ato përfshijnë praktika të ndaluara nga paragrafi 14 dhe (ii) të përmirësojë politikat e tij kontabël nëse kjo lejohet nga paragrafët 22-30.
- (c) Ofruesi i shërbimit shqyrton faktin nëse kosto e plotësimit të detyrimeve të tij kontraktuale për të dhënë shërbime tejkalon të ardhurat e marra në avancë. Për të bërë këtë, ai zbaton testin e mjaftueshmërisë së detyrimeve të përshkruar në paragrafët 15-19 të këtij SNRF. Nëse ky SNRF nuk zbatohet për këto kontrata, ofruesi i shërbimit do të zbatojë SNK 37 për të përcaktuar nëse kontratat janë me kushte rënduese.
- (d) Për këto kontrata, kërkesat për dhënien e informacioneve shpjeguese të këtij SNRF, ka pak të ngjarë të shtojnë më shumë dhënien e informacioneve të kërkuara nga SNRF-të e tjera.

Dallimi midis rrezikut të sigurimit dhe rreziqeve të tjera

- B8 Përkufizimi i një kontrate sigurimi i referohet rrezikut të sigurimit, të cilin ky SNRF e përkufizon si rrezik të ndryshëm nga *rreziku financiar*, të transferuar nga mbajtësi i një kontrate tek lëshuesi. Një kontratë që ekspozon lëshuesin ndaj rrezikut financiar pa rrezik të rëndësishëm sigurimi, nuk është një kontratë sigurimi.
- B9 Përkufizimi i rrezikut financiar në Shtojcën A përfshin një listë të variablave financiarë dhe jo-financiarë. Kjo listë përfshin variabla jo-financiarë të cilët nuk janë specifikë për një palë të kontratës, të tillë si një indeks i humbjeve nga tërmeti në një rajon të caktuar, ose një indeks i temperaturës në një qytet të caktuar. Ajo përjashton variablat jo-financiarë, që janë specifikë për një palë të një kontrate, të tilla si ndodhja ose mos ndodhja e një zjarri, që dëmton ose shkatërron një aktiv të asaj pale. Për më tepër, rreziku i ndryshimeve në vlerën e drejtë të një aktivi jo-financiar nuk është një rrezik financiar, nëse vlera e drejtë pasqyron jo vetëm ndryshimet në çmimet e tregut për aktive të tilla (një variabël financiar) por gjithashtu, kushtin e një aktivi specifik jo-financiar të mbajtur nga një palë në një kontratë (një variabël jo-financiar). Për shembull, nëse një garanci e vlerës së mbetur të një veture të caktuar ekspozon garantuesin ndaj rrezikut të ndryshimit të kushteve fizike të makinës, ky rrezik është një rrezik sigurimi, jo rrezik financiar.
- B10 Disa kontrata e ekspozojnë siguruesin ndaj rrezikut financiar, përveç rrezikut të rëndësishëm të sigurimit. Për shembull, shumë kontrata sigurimi jete garantojnë një normë minimale kthimi për mbajtësit e policës së sigurimit (duke krijuar rrezik financiar) dhe premtojnë përfitime në rast vdekje, të cilat në disa raste tejkalojnë ndjeshëm tepricën e llogarisë së mbajtësit të policës së sigurimit (duke krijuar rrezik sigurimi në formën e rrezikut të mortalitetit). Kontrata të tilla janë kontrata sigurimi.
- B11 Sipas disa kontratave, një ngjarje e siguruar synon pagesën e një shume të lidhur me një indeks çmimi. Kontrata të tilla janë kontrata sigurimi, nëse pagesa që është e kushtëzuar me ngjarjen e siguruar mund të jetë e rëndësishme. Për shembull, një pagesë vjetore nga siguruesi për sigurimin e jetës, e lidhur me një indeks të koston së jetës, transferon rrezik sigurimi sepse pagesa synohet nga një ngjarje e pasigurt-mbijetesa e përfituesit të policës së sigurimit të jetës. Lidhja me indeksin e çmimit është një derivativ i përfshirë, por ajo gjithashtu transferon rrezik sigurimi. Nëse transferimi që rezulton i rrezikut të sigurimit është i rëndësishëm, derivativi i përfshirë plotëson përkufizimin e një kontrate sigurimi, rast në të cilin ai nuk ka nevojë të veçohet dhe të matet me vlerën e drejtë (shih paragrafin 7 të këtij SNRF).
- B12 Përkufizimi i rrezikut të sigurimit i referohet rrezikut që siguruesi pranon nga mbajtësi i policës së sigurimit. Me fjalë të tjera, rreziku i sigurimit është një rrezik para-ekzistues, i transferuar nga mbajtësi i policës së sigurimit tek siguruesi. Kështu, një rrezik i ri i krijuar nga kontrata nuk është një rrezik sigurimi.
- B13 Përkufizimi i një kontrate sigurimi i referohet një efekti negativ mbi mbajtësin e policës së sigurimit. Përkufizimi nuk e kufizon pagesën nga siguruesi të një shumë të barabartë me ndikimin financiar të ngjarjes negative. Për shembull, përkufizimi nuk përjashton mbulimin 'i ri-për- të vjetër' që paguan mbajtësi i policës së sigurimit, e cila është e mjaftueshme për të lejuar zëvendësimin e një aktivi të dëmtuar të vjetër me një aktiv të ri. Në mënyrë të ngjashme, përkufizimi nuk kufizon pagesën sipas një kontrate të sigurimit të jetës me afat, në humbjen financiare të pësuar nga personat në ngarkim të të larguarit nga jeta, dhe as nuk përjashton pagimin e shumave të parapërcaktuara për të caktuar sasinë e humbjes së shkaktuar nga vdekja ose një aksident.
- B14 Disa kontrata kërkojnë një pagesë nëse ndodh një ngjarje e pasigurt e caktuar, por nuk kërkojnë një efekt negativ mbi mbajtësin e policës së sigurimit si një parakusht për pagesën. Një kontratë e tillë nuk është kontratë sigurimi edhe nëse mbajtësi e përdor kontratën për të zbutur një ekspozim bazë ndaj rrezikut. Për shembull, nëse mbajtësi përdor një derivativ për të mbrojtur një variabël bazë jo-financiar, i cili është i lidhur me flukset e mjeteve monetare nga një aktiv i njësisë ekonomike, derivativi nuk është një kontratë

sigurimi sepse pagesa nuk kushtëzohet nga fakti që mbajtësi ndikohet negativisht nga një pakësim i flukseve të mjeteve monetare nga aktivi. Anasjelltas, përkufizimi i një kontrate sigurimi i referohet një ngjarjeje të pasigurt, për të cilën një efekt negativ mbi mbajtësin e policës së sigurimit, është një parakusht kontraktual për pagesën. Parakushti kontraktual nuk kërkon që siguroesi të hetojë nëse ngjarja vërtet ka shkaktuar një efekt negativ, por i lejon siguroesit të refuzojë pagesën nëse ai nuk është i bindur se ngjarja ka shkaktuar një efekt negativ.

- B15 Rreziku i gabimit ose ngulmimit (d.m.th. rreziku që pala tjetër do të anulojë kontratën më herët ose më vonë sesa lëshuesi kishte parashikuar kur kishte caktuar çmimin e kontratës) nuk është një rrezik sigurimi, sepse pagesa ndaj palës tjetër nuk kushtëzohet nga nja ngjarje e pasigurt e ardhshme që ndikon negativisht palën tjetër. Në mënyrë të ngjashme rreziku i shpenzimit (d.m.th. rreziku i rritjes së papritur në kostot administrative të lidhura me shërbimin e një kontrate, dhe jo në kostot lidhur me ngjarjet e siguruarat) nuk është rrezik sigurimi, sepse një rritje e papritur në shpenzime nuk ndikon negativisht palën tjetër.
- B16 Prandaj një kontratë që e ekspozon lëshuesin ndaj rrezikut të gabimit, rrezikut të ngulmimit ose rrezikut të shpenzimeve, nuk është një kontratë sigurimi me përjashtim të rastit kur ajo e ekspozon lëshuesin ndaj rrezikut të sigurimit. Megjithatë nëse lëshuesi i kësaj kontrate e zbut këtë rrezik duke përdorur një kontratë të dytë për transferimin e një pjesë të këtij rreziku tek një palë tjetër, kontrata e dytë e ekspozon palën tjetër ndaj rrezikut të sigurimit.
- B17 Një siguroes mund të pranojë rrezik të rëndësishëm sigurimi nga mbajtësi i policës së sigurimit vetëm nëse siguroesi është një njësi ekonomike e veçantë nga mbajtësi i policës së sigurimit. Në rastin e një siguroesi të përbashkët, i përbashkëti pranon rrezik nga çdo mbajtës i policës së sigurimit dhe e grumbullon këtë rrezik. Megjithëse mbajtësit e policës së sigurimit mbartin këtë rrezik të grumbulluar kolektivisht në cilësinë e tyre si pronarë, i përbashkëti ende e ka pranuar rrezikun që është thelbi i një kontrate sigurimi.

Shembuj të kontratave të sigurimit

- B18 Në vijim jepen shembuj kontratash që janë kontrata sigurimi, në rast se transferimi i rrezikut të sigurimit është i rëndësishëm:
- (a) sigurimi ndaj vjedhjes ose dëmtimit të pronës.
 - (b) sigurimi ndaj detyrimit për produktin, detyrimit profesional, detyrimit civil ose shpenzimeve ligjore.
 - (c) sigurimi i jetës dhe skemat e parapagimit të funeralit (megjithëse vdekja është e sigurt, nuk është e sigurt se kur ajo do të ndodhë, ose për disa tipe sigurimi jete, nëse vdekja do të ndodhë brenda periudhës së mbuluar nga sigurimi).
 - (d) pagesat vjetore nga siguroesi të lidhura me sigurimin e jetës dhe pensionet (d.m.th. kontratat që sigurojnë kompensim për ngjarjen e ardhshme të pasigurt-mbijetesën e përfutjesit ose pensionistit-për të ndihmuar përfutjesin ose pensionistin në mbajtjen e një standardi të caktuar jetese, i cili në kushte të tjera do të ndikohet negativisht nga mbijetesa e tij ose e saj).
 - (e) mbulimi i paaftësisë fizike dhe mjekësor.
 - (f) obligacionet e sigurta, obligacionet besnike, obligacionet e performancës dhe obligacionet ofertë (d.m.th. që sigurojnë kompensim nëse pala tjetër nuk përmbush detyrimin kontraktual, për shembull, detyrimin për ndërtimin e ndërtesës).
 - (g) sigurimi i kredisë që siguron bërjen e pagesave të caktuara për të rimbursuar mbajtësin për një humbje që pëson për shkak se një debitor i caktuar nuk bën pagesat kur ato kërkohen, në përputhje me termat fillestare ose të modifikuara të një instrumenti borxhi. Këto kontrata mund të kenë forma ligjore të ndryshme, të tilla si një garanci, disa lloje letër kredie, një kontratë kredie derivative e mospagimit ose një kontratë sigurimi. Megjithatë, ndonëse këto kontrata plotësojnë përkufizimin e një kontrate sigurimi, ato plotësojnë edhe përkufizimin e një kontrate të garancisë financiare të dhënë në SNRF 9 dhe janë brenda objektit të SNK 32⁵ dhe SNRF 9 dhe jo të këtij SNRF (shih paragrafin 4(d)). Sidoqoftë, nëse lëshuesi i kontratave të garancisë financiare ka pohuar më parë në mënyrë të qartë se i sheh këto kontrata si kontrata sigurimi dhe ka përdorur kontabilitetin e zbatueshëm për kontratat e sigurimit, lëshuesi mund të zgjedhë të zbatojë ose SNK 32⁶ dhe SNRF 9, ose këtë SNRF për kontrata të tilla të garancisë financiare.
 - (h) garancitë e produkteve. Garancitë e produkteve të lëshuara nga një palë tjetër për mallra të shitura nga një prodhues, ndërmjetës ose shitës me pakicë, janë brenda objektit të këtij SNRF. Megjithatë

5 Kur një njësi ekonomike zbaton SNRF 7, referenca tek SNK 32 zëvendësohet nga një referencë tek SNRF 7.

6 Kur një njësi ekonomike zbaton SNRF 7, referenca tek SNK 32 zëvendësohet nga një referencë tek SNRF 7.

garancitë e produktit të lëshuara direkt nga një prodhues, ndërmjetës ose shitës me pakicë janë jashtë objektit të tij, sepse ato janë brenda objektit të SNK 15 dhe SNK 37.

- (i) sigurimi i titujve (d.m.th. sigurimi ndaj zbulimit të defekteve në tituj të tokës, të cilat nuk ishin të dukshme kur u nënshkrua kontrata e sigurimit). Në këtë rast ngjarje e siguruar është zbulimi i një defekti në titull, jo defekti në vetvete.
- (j) ndihma në udhëtim (d.m.th. kompensimi në mjete monetare ose në natyrë për mbajtësit e policës së sigurimit për humbje të pësura gjatë udhëtimit). Paragrafët B6 dhe B7 trajtojnë disa kontrata të kësaj natyre.
- (k) obligacionet e katastrofës, të cilat ofrojnë pagesa të zvogëluara të primit, interesit ose të dyjave, nëse një ngjarje e caktuar ndikon negativisht lëshuesin e obligacionit (me përjashtim të rastit kur ngjarja e caktuar nuk krijon rrezik sigurimi të rëndësishëm, për shembull, nëse ngjarja është një ndryshim në një normë interesi ose në një normë të kurseve të këmbimit).
- (l) kontratat e sigurimit swaps dhe kontrata të tjera që kërkojnë një pagesë bazuar në ndryshimet në variablat klimaterikë, gjeologjikë ose variabla të tjerë fizikë, të cilat janë specifike për një palë në kontratë.
- (m) kontratat e ri sigurimit.

B19 Në vijim jepen shembuj të zërave që nuk janë kontrata sigurimi:

- (a) kontrata të investimit që kanë formë ligjore të një kontrate sigurimi, por që nuk e ekspozojnë siguruesin ndaj rrezikut të rëndësishëm të sigurimit, për shembull, kontratat e sigurimit të jetës në të cilat siguruesi nuk mbart rrezik të rëndësishëm mortaliteti (të tilla kontrata janë instrumente financiarë jo-sigurimi ose kontrata shërbimi, shih paragrafët B20 dhe B21).
- (b) kontratat që kanë formë ligjore të sigurimit, por që kalojnë të gjithë rrezikun e rëndësishëm të sigurimit tek mbajtësi i policës së sigurimit nëpërmjet mekanizmave të paanullueshëm dhe detyrues, që rregullojnë pagesat e ardhshme të mbajtësit të policës së sigurimit si një rezultat direkt i humbjeve të siguruara, për shembull, disa kontrata financiare ri sigurimi ose disa grupe kontratash (të tilla kontrata janë zakonisht instrumente financiarë jo-sigurimi ose kontrata shërbimi, shih paragrafët B20 dhe B21).
- (c) vetë-sigurimi, me fjalë të tjera, mbajtja e një rreziku që mund të ishte mbuluar nga sigurimi (nuk ka kontratë sigurimi, sepse nuk ka marrëveshje me palën tjetër).
- (d) kontrata (të tilla si kontratat e lojërave të fatit) që kërkojnë një pagesë nëse ndodh një ngjarje e pasigurt e caktuar, por nuk kërkojnë që ngjarja të ndikojë negativisht mbajtësin e policës së sigurimit si një parakusht për pagesën. Megjithatë kjo nuk ndalon specifikimin e një pagese të paracaktuar për të përcaktuar në mënyrë sasiore humbjen e shkaktuar nga një ngjarje e caktuar e tillë si, vdekja ose një aksident (shih gjithashtu paragrafin B13).
- (e) derivativët që ekspozojnë një palë ndaj rrezikut financiar por jo ndaj rrezikut të sigurimit, sepse ata kërkojnë që pala të bëjë pagesa bazuar vetëm në ndryshimet në një ose më shumë tregues si, norma interesi të caktuara, çmimi i instrumenteve financiarë, çmimi i mallrave, norma e kurseve të këmbimit, indeksi i çmimeve ose normave, klasifikimi i kredisë ose indeksi i kredisë apo tregues të tjerë, nëse në rastin e një treguesi jo-financiar ky variabël nuk është specifik për një palë të kontratës (shih SNRF 9).
- (f) një garanci e lidhur me kredinë (ose letër kredia, kontratat e kredisë së derivativit të mospagimit ose kontratat e sigurimit të kredisë) që kërkojnë pagesa edhe nëse mbajtësi nuk ka pësuar një humbje nga dështimi i debitorit për të bërë pagesat në kohën e duhur (shih SNRF 9).
- (g) kontrata që kërkojnë një pagesë bazuar në ndryshimet në variablat klimaterikë, gjeologjikë ose variabla të tjerë fizikë, të cilët nuk janë specifike për një palë në kontratë (zakonisht të përshkruara si derivativë të motit).
- (h) obligacionet katastrofë që ofrojnë pagesa të pakësuar të principalit, interesit ose të dyjave, bazuar në një variabël klimaterik, gjeologjik ose variabël tjetër fizik, i cili nuk është specifik për një palë të kontratës.

B20 Nëse kontratat e përshkruara në paragrafin B19 krijojnë aktive financiare ose detyrime financiare, ato janë brenda objektit të SNRF 9. Ndër të tjera, kjo do të thotë se palët e kontratës përdorin atë që ndonjëherë quhet kontabilitet depozite, që përfshin sa vijon:

- (a) një palë njih shumën e marrë si një detyrim financiar, dhe jo si të ardhur.
- (b) pala tjetër njih shumën e paguar si një aktiv financiar, dhe jo si një shpenzim.

- B21 Nëse kontratat e përshkruara në paragrafin B19 nuk krijojnë aktive financiare ose detyrime financiare, zbatohet SNK 15. Sipas SNRF 15 e ardhura njihet kur (ose) një njësi ekonomike plotëson kushtet e performancës duke transferuar premtimin për të mirën dhe shërbimin tek një klient me një vlerë e cila reflekton konsiderueshëm pritshmëritë e njësisë ekonomike.

Rreziku i rëndësishëm i sigurimit

- B22 Një kontratë është një kontratë sigurimi vetëm nëse ajo transferon rrezik të rëndësishëm sigurimi. Paragrafët B8-B21 trajtojnë rrezikun e sigurimit. Paragrafët në vijim trajtojnë vlerësimin e faktin nëse rreziku i sigurimit është i rëndësishëm. Paragrafët në vijim trajtojnë vlerësimin e faktin nëse rreziku i sigurimit është i rëndësishëm.
- B23 Rreziku i sigurimit është i rëndësishëm nëse dhe vetëm nëse një ngjarje e siguruar mund të shkaktojë që një sigures të paguajë përfitime shtesë të rëndësishme në ndonjë situatë, me përjashtim të situatave që nuk kanë thelb tregtar (d.m.th. nuk ka efekt të dukshëm në ekonominë e transaksionit). Nëse përfitimet shtesë të rëndësishme do të ishin të pagueshme në situata që kanë përmbajtje tregtare, kushti në fjalinë e mëparshme mund të plotësohet edhe nëse ngjarja e siguruar ka shumë pak mundësi, ose edhe nëse vlera aktuale e pritshme (d.m.th. probabiliteti i ponderuar) e flukseve të mjeteve monetare të kushtëzuara, është një pjesë e vogël e vlerës aktuale të pritshme të të gjitha flukseve të mbetura kontraktuale.
- B24 Përfitimet shtesë të përshkruara në paragrafin B23 i referohen shumave që tejkalojnë ato që mund të jenë të pagueshme, nëse nuk do të ndodhte ngjarja e siguruar (duke përjashtuar situatat që nuk kanë përmbajtje tregtarë). Këto shuma shtesë përfshijnë kostot e trajtimit dhe të vlerësimit të kërkesave, por përjashtojnë:
- (a) humbjen e aftësisë për t'i ngarkuar mbajtësit e policës së sigurimit për shërbimet e ardhshme. Për shembull, në një kontratë sigurimi jete të lidhur me investime, vdekja e mbajtësit të policës së sigurimit do të thotë se siguresi nuk mund të vazhdojë të kryejë shërbimet e menaxhimit të investimit dhe të grumbullimit të një komisioni për të bërë këtë. Megjithatë, kjo humbje ekonomike për siguresin nuk pasqyron rrezikun e sigurimit njëllor sikur një menaxher i fondeve të përbashkëta nuk ndërmerr rrezik sigurimi lidhur me vdekjen e mundshme të klientit. Prandaj humbja e mundshme e komisioneve të ardhshme të menaxhimit të investimeve nuk është e rëndësishme në vlerësimin se sa shumë rrezik sigurimi transferohet nga një kontratë.
 - (b) me vdekjen heqja dorë nga detyrimet që mund të ishte bërë në anulim ose dorëzim. Për shkak se kontrata solli krijimin e këtyre detyrimeve, heqja dorë nga këto detyrime nuk kompenson mbajtësin e policës së sigurimit për një rrezik para-ekzistues. Prandaj ato nuk janë të rëndësishëm në vlerësimin sesa rrezik sigurimi transferohet nga një kontratë.
 - (c) një pagesë e kushtëzuar në një ngjarje e cila nuk i shkakton një humbje të rëndësishme mbajtësit të kontratës. Për shembull, merrni në konsideratë një kontratë, e cila kërkon që lëshuesi të paguajë një milion njësi monetare nëse një aktiv pëson një dëmtim fizik duke shkaktuar një humbje të parëndësishme ekonomike të një njësie monetare të mbajtësit. Në këtë kontratë, mbajtësi transferon tek siguresi rrezikun e parëndësishëm të humbjes së një njësie monetare. Në të njëjtën kohë, kontrata krijon rrezik jo-sigurimi, që siguresi do të duhet të paguajë 999,999 njësi monetare nëse ndodh ngjarja e specifikuar. Për shkak se lëshuesi nuk pranon rrezik të rëndësishëm të sigurimit nga mbajtësi, kjo kontratë nuk është një kontratë sigurimi.
 - (d) rikuperime të mundshme të ri sigurimit. Siguresi i trajton këto veças.
- B25 Një sigures duhet të vlerësojë rëndësinë e rrezikut të sigurimit kontratë për kontratë, dhe jo duke ju referuar materialitetit të pasqyrave financiare.⁷ Prandaj rreziku i sigurimit mund të jetë i rëndësishëm edhe nëse ka një probabilitet minimal të humbjeve materiale për të gjitha kontratat. Prandaj rreziku i sigurimit mund të jetë i rëndësishëm edhe nëse ka një probabilitet minimal të humbjeve materiale për të gjitha kontratat. Ky vlerësim kontratë-për-kontratë lehtëson klasifikimin e një kontrate si një kontratë sigurimi. Megjithatë nëse një grup relativisht homogjen kontratash të vogla njihet se përbëhet nga kontrata që të gjitha transferojnë rrezik sigurimi, një sigures nuk ka nevojë të analizojë çdo kontratë brenda këtij grupi për të identifikuar disa kontrata jo-derivative, të cilat transferojnë rrezik të parëndësishëm sigurimi.
- B26 Nga paragrafët B23-B25 vijon se nëse një kontratë pagan një përfitim për vdekje, që tejkalon shumën e pagueshme në mbijetesë, kontrata është një kontratë sigurimi me përjashtim të rastit, kur përfitimi shtesë për vdekjen është i parëndësishëm (i gjykuar duke iu referuar kontratës dhe jo një grupi të tërë kontratash). Siç vihet në dukje në paragrafin B24(b), me vdekjen, heqja dorë nga anulimi ose dorëzimi i detyrimit nuk përfshihet në këtë vlerësim, nëse kjo heqje dorë nuk kompenson mbajtësin e policës së sigurimit për një rrezik para-ekzistues. Në mënyrë të ngjashme një kontratë e përvitshme që pagan shumën të rregullta për

7 Për këtë qëllim kontratat e nënshkruara njëkohësisht me palën tjetër (ose kontratat të cilat janë të ndërvarura) nga një kontratë e vetme.

jetën e mbetur të mbajtësit të policës së sigurimit është një kontratë sigurimi, me përjashtim të rastit kur pagesat e bashkuara të kushtëzuara për sigurimin e jetës janë të parëndësishme.

- B27 Paragrafi B23 i referohet përfitimeve shtesë. Këto përfitime shtesë mund të përfshijnë një kërkesë për të paguar përfitimet më herët nëse ngjarja e siguruar ndodh më herët dhe pagesa nuk rregullohet për vlerën në kohë të parasë. Një shembull është sigurimi i plotë për jetën për një shumë fikse (me fjalë të tjera, sigurimet që ofrojnë një përfitim për vdekjen të fiksuar, pavarësisht se kur vdes mbajtësi i policës së sigurimit, pa datë skadimi për mbulimin). Është e sigurt se mbajtësi i policës së sigurimit do të vdesë, por data se kur do të ndodhë nuk është e sigurt. Siguruesi do të pësojë një humbje për ato kontrata individuale në të cilat mbajtësi i policës së sigurimit vdes më herët, edhe nëse nuk ka një humbje të përgjithshme për të gjithë grupin e kontratave..
- B28 Nëse një kontratë sigurimi është e veçuar në përbërësin depozitë dhe në përbërësin sigurim, rëndësia e transferimit të rrezikut të sigurimit vlerësohet duke ju referuar përbërësit sigurim. Rëndësia e rrezikut të sigurimit të transferuar nga një derivativ i përfshirë vlerësohet duke ju referuar derivativit të përfshirë.

Ndryshimet në nivelin e rrezikut të sigurimit

- B29 Disa kontrata nuk transferojnë ndonjë rrezik sigurimi tek lëshuesi që në fillim, megjithëse transferojnë rrezik sigurimi në një moment të dytë. Për shembull, merrni në konsideratë një kontratë që siguron një kthim të caktuar nga investimi dhe përfshin një opsion për mbajtësin e policës së sigurimit për të përdorur të ardhurat e investimit në maturim, për të blerë një kontratë sigurimi të përvitshme jete të kushtëzuar me normat aktuale të përvitshme të përdorura nga siguruesi për përfitues të tjerë të rinj, nëse mbajtësi i policës së sigurimit ushtron opsionin. Kontrata nuk transferon rrezik sigurimi tek lëshuesi derisa të ushtrohet opsioni, për shkak se siguruesi është i lirë të çmojë të përvitshmen mbi një bazë që pasqyron rrezikun e sigurimit të transferuar tek siguruesi në atë kohë. Megjithatë, nëse kontrata specifikon normat e të përvitshmes (ose një bazë për vendosjen e normave të të përvitshmes), kontrata transferon rrezik sigurimi tek nxjerrësi që në krijim.
- B30 Një kontratë që kualifikohet si një kontratë sigurimi mbetet një kontratë sigurimi derisa të gjitha të drejtat dhe detyrimet të shlyhen ose skadojnë.

